

**NAKILOGIAENA**  
**Naña Yoane Pisuia**  
**Ana Siriyuia**  
**Visayuena Na Tusi Nene**

*Suniena plas na tusi nini*

E tusi nini, Yoani siriyu suri la naña Yesu Kristo kila meraravan pania. Tusi nene, kiena kia na plas “*Nakilologiaena*”.

Yoane siri tusi nini e pogos naña le Rom lala akila suri m̄arera manene la pañisi pa li nalelagaena lala, a asum̄a añeñom̄ari la ke amarmare, komin naña amlelaga e Yesu Kristo. Yoane siri m̄aki nini vena visirplanen sitomiena kiena la nene, vena asum̄alu m̄arera e pogos m̄arera lala.

E tusi nini, tekilia teulo suri la naña sane m̄eniena naña Yesu kila meraravan pa Yoane, naga pisayu totou na suri lala vena li nalelagaena la e pogos nene akilia alogekilalea kana kinasa. Ana yaru tañena lala tañatete akilia kana kinasa. Sitomien kiena totou lala na tusi nene sanini. Yesu Kristo, naga pe Ntewa namava, a pe kieta Suñe, a e limana, Ntewa yoko kila kare make nena Yermare amio nasinekar tañena lala. Pogos naña kila make yum̄aena nene, yoko naga la nalaena kiena yaru la naña asum̄alu m̄arera e kiela lelagaena lala. Yoko were la ava asike amio naga mae peni viu a e yomarava viu naña naga kila ruru make rui.

*Komþasnen tusi la na nini*

Visena þesa 1:1-8

Suri þesa naþa Yoane mēnia pisuia, ana lumāki  
lala pae sunāre olua 1:9—3:11

Tusi naþa ve yaru vike re, naþa suri la olua  
sike ea 4:1—8:1

Kumasua olua 8:1—11:19

Alkita amio suri mali lua naþa la apiowa paþisi  
12:1—13:18

Suri na mēniena taþena la naþa Yoane pisuia  
14:1—15:8

Pialora olua naþa apulen sinemimiena kiena  
Ntewa 16:1-21

Ntewa kila kare pulkumali naþa Þapilon a  
taulu surmali naþa piowa, amio navisalu-  
aena kokani, amio Yermare 17:1—20:10

Ntewa la nakoena va yaru lala e legiena maro  
20:11-15

Peni viu amio yomarava viu, a Yerusalem viu  
21:1—22:5

Visena maro 22:6-21

*Navisa meraravanen tus nini*

<sup>1</sup> Tus nini naga nakilologiaena na sur ya la  
naþa yoko aim aňaliv e legiena la naþa pimi ke  
na wa. Ntewa sinenan yar la naþa amiyuňae  
kiena ke e yomarava la monar akilia ruru sur  
la nini, ana naga mla nakiliaena la nene pa  
Yesu Kristo, yoko Yesu pitetalia kiena navisi  
tai pimi mľalivin kiena yar na yuňaena naþa  
Yoane, kila sur la nene pimi þarpoyo e kiena  
mēnien tai. <sup>2</sup> Yoane tol mēniena nene, ana pisu  
kilale sape nanene visena kiena ne Ntewa pe  
lelaga, pe visena lelaga nena napo naþa navisa

meraravanen ya naña yoko Yesu Kristo yuñāen sirau, kila narui siriwal ruru make sur naña naga pisuia, vena nasirau takilia tauloia.

<sup>3</sup> Ana yoko yar a naña wolo visena na vi-sawalen la nene, pona yagogonia, ligān ruru teke e sinena, yoko na visaruruena kiena ne Ntewa ve keviu e kiena malena, komin naña pogos na legiena keviu nene pimi ke lavis manene laa narui.

*Yoane siar visawalen kiena mēniena e visen tai nayeluaren Ntewa*

<sup>4</sup> In na Yoane, nesiri plan visena la nini imāsu van amiu pēgas na lelagaena la olua naña asike e pulkumali lala e pupia lepas naña tepio tesape Esia. Nekekaran naña nevitawe amiu e kia kien naga naña sike na konua rui, sike nanagane, a yoko sike sike lue. Nemlen wo amiu ke nesape pupia lemamiēna a sumāre sike e kiamiu malena la silaga, naña yoko tol amiu imi kome kieta Ntewa nene amio kiena ninuna olua naña asmāl asike vamon kiena lele wa na totanoena. <sup>5</sup> A kilia imi mēna kome Yesu Kristo, naña naga masisu mā pano kana kuruta mlau, siraunia naga pēs naña mal si petan marena, naña nagane naga pe pārin supē kiena ne pārin supē na yomarava lala.

Ee, Yesu Kristo ke nanene narui naña naga sinen sii ita paṗisi pano-o tamān kana kuruta mlau vena ul plan ita vetan koaena na kieta mlamulen viowa lala, <sup>6</sup> ana naga pisirlua ita teim teve mratava ve taaga na lus kiena ne kiena

narin suþe lala, a naga mligan plan ita vena teiila naga sa naþa tepe yar wa na yuþaena kiena ne arimana, nane Ntewa na mava.

Yesu na kila po pan ita sanene wa, ana popon teyeluar kiena kia, tevisirlua naga va manene laa metava, vano vano-o ve þisi re pogos tai, sanene.

<sup>7</sup> Avisu ruruia! Naga ke narui naþa suþa kupanpo lul la metava malivin sape vitom tano! Yoko ita make ga kilamarata visuia, ore, amio mena la naþa asuar naga e lak torovia, la mena yoko avisu kilale si naga. Ana yoko pupia sineyeena a tagena molue e yeririna na yomarava lala pogos naþa asitoal si e ya naþa la akila pan nanua sumo. Yoko ve sa ke nene narui, nevisa "sanene" ea.

<sup>8</sup> Popon tevatanon Suþe Ntewa, Ntewa na mareraena nae meta manenea, naga naþa sike kemua rui, sike nagane, a yoko sike sike lue, naþa kiena visena urmi tai pisa sanini, sape "In na nepe purþesa, in na neve luasa."

### *Yoane pisu totou na Yesu*

<sup>9</sup> Kam erau make lala, in Yoane in na nepe wenla amiu, naþa nevisawal sur make van amiu. Nesape nevisawal van amiu komin naþa ita ke narui naþa tepe kiena ne Yesu, ita ke narui naþa tesike vatanon kiena nasuþenena, ita ke narui naþa tesuþa toþar pae ke nalogeen viowa na pog marera nene, a ita ke narui naþa tesuþa takawean ita ke temio sitomena napiyavi.

---

**1:7** Mat 24:30; Mak 13:26; Luk 21:27; 1Tes 4:17, Yoan 19:34,37, Mat 24:30    **1:8** Nakilol 22:13

Pogaga, kiau sunena va sanini, sane nanua sumo, nesumã nepisawal ke visen kiena ne Ntewa, nemlologon m̃a Yesu Kristo pano-o, le Rom la amla nakoena pan inu, amligan inu nepim nemiyumãe korena e narin purvanua nini, kien kia Patmos. <sup>10</sup> Ana e Legiena Wa tai, nesumã sane nemloge sane Ninuna pimi e inu, nemloge pulgo tai varaun inu, pulgon keviu sane kumasua mielu, pisa sanini sape

<sup>11</sup> “Ya ne yoko ovisu ne,  
ovisuia osirilua va e tus tai,  
yoko oligan va teliliv viora e sumãre punu ga na  
lepas nae Esia,  
vena akilia auloia.  
Sumãre la nene, la olua, nane Episas, Sumãana,  
Pekamãam, Taeatara, Satis, Pilatelpia, a  
Laotisia.”

<sup>12</sup> Pulgo nene sumã pis pan inu sanene, ana sineun nesape nevisu ane sanene, noþarpu inu sane nepisu lan kantel ga la sike na, la olua naþa amiyumãen e kol. <sup>13</sup> Lan kantel la asmãl ga asike sanene, ana yoko nomãl yar tai sumãl sike likan la, naþa naga sanena naþa asape Narina ne Yeririna. Naga miyen kulsota piavi tai, amio kulmrae tai naþa amiyumãen e kol, atelan þaro e yerena. <sup>14</sup> Vilþarina, miyuwowo na miyuwowo manene laa, a kilamarana tego sane kap naþa mluamene. <sup>15</sup> Lana m̃arera ruru po, sane pototo naþa m̃arera ruru po, pilavila, a pogos naþa naga pis, pulgona m̃aaga sane sii naþa þanpo e piañe.

<sup>16</sup> Naga sumãlar sumã ga sa naþa e limana marua, mlarar ke verue olua, a playu na mara naþa mal na mal e lepas luwoka molue ke kome

logona. Marana mēna ga, suwala, miyuwowo na miyuwowo, sa naṗa mrae tego māraera kolpae.

<sup>17</sup> Nepisu sanene, lelaga, kila narui nemare nenaga, nemlor nena e mialana. Ana kian limana marua pimi tol inu, pisape

“Ve omarau re, in naṗa nepe nasiarena a nepe naluasa.

<sup>18</sup> Naga naṗa pe purṗes nen malena, inu, komin nemali, ṗisna nemare, ṗisna nemal sina, ana nemal lue narui.

In ke narui naṗa ki namarena amio ki na pulukapi viowa kiena ne yar na marena lala sike e luṃau.

<sup>19</sup> Ana marauen toko, osiri plan ga ya naṗa opisu ke ne, naṗa lepas nanagane, ṗarar lepas naṗa na legiena la naṗa pimi ke na wa.

<sup>20</sup> A nevisa sur ta van ko sumo wa, e lepas na verue olua naṗa opisu e luṃau, amio purṗes nen kantel olua naṗa amiyuṃaen e kol. Sur la nene sane kiliaen tai naṗa tapolou, ana kala kinasa sanini, verue olua nene, naga navisi la olua vena visuaren suṃare la olua.”

## 2

### *Lumāki na suṃare olua*

<sup>1</sup> Ana Yesu pisa ke sina pan inu, sape “Nagane yoko nevisawal ya naṗa okilia osiri va vininua suṃare olua naṗani.”

*Mak nasumo, naga va e suṃare nae Episas, naga suṃare naṗa pe sinesiiena su re e poli*

“Osiri p̄esan m̄ak va van navisi na suṃare na pulkumali naṓa Episas, osiri sanini, ovisave ‘Visena nene pimi pan amiu pimi kome naga naṓa mlarar ke verue olua e limana marua, suṃa mjaloro teteliv ke likan miasin kantel la olua naṓani.

<sup>2</sup> “ ‘Naga pisawal pan amiu sanini, sape, “In na nepisu kilale amiu rui. Nepisu kiamiu yuṃaena wo lala, nepisu naṓa aṓio paṓisi, nepisu naṓa aṃareran amiu amio kiamiu sitomena viayavi lala po paṓisi. Nepisu m̄ena po paṓisi sa naṓa pe atam̄an re yar viowa la apim akila kare amiu poli, komin naṓa laṓas, pog naṓa apim aṃalivin amiu, apisape la ape li na lologena, ana sa naṓa kam na akilali la, a apisuveve ruru la, ana akirawal rui sane apisokan ga. <sup>3</sup> Komin ga kiau kia naṓa amla ke rui, kam na apane pog m̄arera lala, a la akila kare amiu, ana nekilia rui kam na pe amligan re poli wa, kam na apuarar ke m̄arera wa, a sitomen naṓa kam na asape sinemiu male paṓisi, pona amloge sa naṓa toroki, nanene naga pe to re nena e amiu poli.

<sup>4</sup> “ ‘ “Kiamiu p̄elaga la nene na po paṓisi, ana lelaga, sur tai teke naṓa kam na asuṃa akila ke ne naṓa in na pe nekekaran re nena ga, a nanene na popon nevisawal mesmesun nena van amiu. Naga sanini, naṓa sane pupia sinesiiena naṓa toṓesan e amiu, nagane pito laa tano, pe sa re si nanua poli. <sup>5</sup> Akilali naṓa sinemiu wasuṓe si e pupia p̄elaga na sinesiiena wo nanua ne, naṓa sinemiu sii inu paṓisi, a sinemiu siisii amiu amio yar taṓena lala. E pogos nene na po na po, ana nagane na, pito tano na pito tano. Ana pogaga,

monar avilon amiu ga, a monar awasuþe amiu e yo wo naþa asu þes e sumo. Ana visae ve avilopu amiu re, nekilia nesape yoko neim noþalivin amiu, neurelua purþes nen kap vivaga naþa suþal sike ne pivaga ke likan amiu nagane.

6 “ ‘ “Lelaga, naga nene naga kiamiu pupia napiowaena tai ne nepisa ga pan amiu na wa, ana sineun nesape nevisawal mēna van amiu sane kam na akila mēna pupia sur wo tai, naþa nekekarana paþisi. Nane naþa kam na asuþa akawe amiu ke amio la naþa akila ke sur nawowe taþena lala, naþa yar naþa Nikolaita mlologon þesania. Apiowa ga, in mēna ga yepmavin nenaga.

7 “ ‘ “Yar naþa kiligan teke ea, popon loge kilale ya naþa Ninuna ne Ntewa pisawal ke pa þegas nen li na lelagaena lala. Yar naþa suþal mārera suþa vano-o taulu naviowaena, yoko netamān vana vena kilia va su nena loyuþa likan lokove nowo kana ne Ntewa, va kan mrasnen lak na malena.” ‘ ‘ ”

*Mak na lua, naga pa e suþare nae Suþana, naga suþare naþa yar la sinela karia*

8 “Monar osiri māþ va va navisi na suþare na pulkumali naþa Suþana, ovisa sanini, ovisave ‘Visena naþa pimi pan amiu, pimi kome naga naþa naga þesa a naga maro, naþa aþemān mare, ana siraunia mal sina.

9 “ ‘Naga visawal van amiu sanini, sape “In na nekilia ruru pog mārera la naþa kam na apisuia, a nekilia nesape limamiu koren ga. A monar



akilia naña pe limamiu koren re poli, ana ape yar na sur moki pañisi! Ee, nekilia sane la naña asape la ape le Yu, akuan ke visen viowa mok liu pan amiu, ana ve asitom re, pe nepisu re nena nesape la ape kiau le Yu la poli, peraga, la na ape yar na taveveen nena Yermare. <sup>10</sup> A pe lelaga, pona ve ve piavi re kam lañasa monar awar pupia naloge viowaena la yo, komin naña amlelaga e inu, ana ve amarau re. Pona Yermare kilia kila naña yoko akoven amiu lañas ava e yumã nakoena yo, vena kilali amiu, ana nekilia nevisave naga yoko kila kare amiu vano tol ga legiena ve lualima. Visae sanene, monar asumãl m̃arera vano-o tol naña alalua kiamiu yalua, ana visae ve alor re e pogos nene, yoko pogos naña aim aṃalivin inu, yoko nela pupia nalaena van amiu, nane karo nañarila namaliena naña pe kol.

<sup>11</sup> “ ‘ “Yar naña kiligan teke ea, popon naga loge kilale ya naña Ninuna ne Ntewa sumã pisawal ke pa li na lelagaena lala. Yar naña taulu ðelaga viowa na malena nene, yoko naga ve va warpo re yo e marena na lua naña yoko imi sirau.” ’ ”

*Mak na telu, naga pa e sumãre nae Pekaṃam, naga sumãre naña taṃan navianena viowa taṃena lala apim loyũã*

<sup>12</sup> “Yam si tai, monar osiri m̃ak va va navisi na sumãre na pulkumali nene Pekaṃam, ovisa sanini, ovisave ‘Visena naña pimi pan amiu ne, pimi kome naga naña ðarar ke playu na mara naña mal ga lepas luwoka.

13 “ ‘Naga pisawal pan amiu sanini, sape “Nek-ilia ruru sane e naña kam asike e ne, naga lepas tai naña likan nena yo naña Yermare pe suñenia! Naga lelana lala sike ga ko pun amiu ne, ana kam na apuarar ke kiau kia na po pañisi. Nanua loyuma e kiamiu pulkumali nene, pona tevisa tevisave pulkumali kiena Yermare, la amemmar kiamiu puruvi naña Antiñas, ana la amareran asape kam na monar alupar kiamiu lelagaena e inu. Ana peraga, sa naña naga piawa ma marera e inu pano tol marena, kam mena ga yar tai pe purmatan inu re poli.

14 “ ‘ “Naga nene naga lepas napo ne, ana sur lañasa naña sineun nesape nevisa mena van amiu. Sur pesa, loyuma e kiamiu pegasa, yeririna lañasa asma naña ataveve ke sitomena lañasa sa ke ga Navisawalena Pelama nanua. Visae asitommal maga, naga ke narui naña pisayu mrapa lañasa pa Pelaka, ana pe piavi re poli Pelaka towea mlavia pa pisayu pa le Israel lala, kila sanene pe piavi re poli, la asma akan kinanena wa la naña yeririna tañena la akila kuñapaena ea pa kiela nono lala, a la asma akila lue ga kolau lala. Akila ke mlamulen piowa la ne sanene, ana taveve visena naña amloge ne, la asitom asape pogaga.

15 “ ‘ “A kana na lua nena, lañas si naña kam na ataman la asike likan kiamiu li na lelagaena lala. Naga nene la naña asma ataveve ke navianena na wowe tañena la nene, naña yar nene Nikolaita naga mlologon pesania.

16 “ ‘ “Visae ve sa nene, kam na monar

avilopu kiamiu sitomen vetan naviowaena la nene! Visae peraga, yoko ve ve piavi re neim nakate pun amiu, a yoko visen la naña nevisa e gou van la e pogos nene, yoko ve sa playu na mara naña te kinekinela, kilapel la vañisi.

17 “ ‘ “Yar naña kiligan teke ea, popon naga loge kilale ya naña Ninuna ne Ntewa pisawal ke pa ðegas nen li na lelagaena lala. Naga naña taulu napiowaena, yoko naga la kiena nalaena wo tai. Yoko nela kinanena tai vania, kinanena nena sa naña le Yu la akan e yokorena, ana naga nene na pe kinanena tai naña pe yar pisu re poli wa. A yoko nela kilavaru yuwowo tai vania, naña ate kia viu tai sike ea, naña naga naña waria, naga ga yoko kilia ruru kana kinasa.” ’ ”

*Mak na vari, naga pa e suñare nae Taeatara, naga suñare naña tañan ga ðelaga piowa suña loyuña ea*

18 “Pogos si tai, monar osiri ñak va va navisi na suñare na pulkumali nene Taeatara, ovisa sanini, ovisave ‘Visena na pimi pan amiu pimi kome Narina ne Yeririna, naña kilamarana pila a pivaga sane purmenen kapi, a lana ñarera sane pototo. 19 Naga pisawal pan amiu sanini, sape “In na nekilia ruru kiamiu yuñena lala, a kiamiu sinesiiena lala amio kiamiu naviawaena, kiamiu yuñena ñarera a sitomena la naña piayavi, a metavanja nekilia nesape nagane kam na akila pa laa narui, taulu naña akila ðesania.

20 “ ‘ “Naga nene naga kana lepas napo ne, ana sur si tai monar nevisa meraravan van amiu.

Nanene e lepas na sira viowa nene, Sesepele, naña apisu kilale kiena napiowaena lala, ana atañan ga kila mña wowe e sur viowa la naña kilakila ke ne. Naga sape naga pe sira tai naña pe navisawalena, a pona kam na amlelaga e naga yo, ana naga pisokan ga ne. E kiena navianena lala, naga sumña p̄ere yar na kiau yum̄aena la apa ape tañena la narui, naña nagane asike e p̄elaga na mlamulena na kolauena rui, a asumña akan ke kinanena kana nono lala, a la asitom asape p̄elaga la nene na pogaga ne. <sup>21</sup> In na nemla pulmas pania vena sitom ruru sina, vilon naga vetan kororak la nene, ana naga yepen mavin ga.

<sup>22</sup> “ “ “Pogaga, kiau sitomena teke rui sane yoko nekila naga m̄ene tog tai na maiena m̄arera lala, a yoko nekila yar la naña akila kolau amio sira nene, visae ve avilon la re e kiela mlamulena viowa lala, yoko la m̄ena aloge viowa vañisi na vañisi. <sup>23</sup> Sira nene, yoko tañatete narina mali, yoko sineu kar la make ga. Ana pogos naña la na p̄egas nen li na lelagaena la avisu sur nene, yoko avisu kilale sane in ke narui, kiau navisuveveena telivi pano tol ya naña teke e sinen yaru, a kilia lual ya naña teke e kiena sitomena. A yoko avisu kilale m̄ena sane in ke narui nesumña nekila maran ke pa yar lala torokin ga p̄elaga na sur la naña akila ke e kiela malena lala.

<sup>24</sup> “ “ “Ana e lepas na pun amiu kam yar tañena lala nae Taeatara, nekilia nesape kam na pe ataveve re navianena kiena ne sira nene poli. Naga kilali naña koven visen kiki la pan amiu, sane yoko naga vike sitomena urmi la naña

tapolou van amiu, ana kam na apisu kilale naña Yermare ga naga pe purp̃esnen visena la nene. Yoko ve nevisa re si sur tañena van amiu, <sup>25</sup> ana nevisa ga sane kam na auarar ga visena lelaga la nene m̃arera naña kam na atol rui, ve aligan re, auarar la m̃a vano-o neim si na.

<sup>26</sup> “ ‘ “Naga naña taulu na viowaena, kila ga taveve ya naña sineunia vano-o tol luas nen pogos nini, yoko nela pupia nalaena vania. Yoko netañan vania naga ve suñen purvanua lala, <sup>27</sup> sa ga naña Tus na Yawena la pisayuia, naña sape

*Naga yoko ve suñen yeririna lala naña laki naña mlarar ke e limana, naga pe pototo m̃arera tai,*

*a la naña ape p̃arm̃arera, naga yoko kuan wowa la e porotano ave kinakinasia sane piaki tai naña amiyuñen ga e porotano. Yauena 2:9*

“ ‘ “Nam̃areraena na kilaen sanene, Ata tañan pan in rui, ana yoko netañan lein va kiau yaru nene. <sup>28</sup> Ana pe naga re ga nene poli, ana yar nene, yoko neligan verue naña Melag sike e limana.

<sup>29</sup> “ ‘ “Yar naña kiligana teke ea, popon naga loge kilale ya naña Ninuna ne Ntewa pisawal ke pa p̃egas nen li nalelagaena lala.” ‘ ”

### 3

*Mak na lima, naga pa e suñare nae Satis, naga suñare naña momalio ga mon m̃aga*

<sup>1</sup> “Monar osiri si m̃ak va va navisi na pulku-mali na suñare nae Satis, ovisa sanini, ovisave

‘Visena nene naŕa pimi pan amiu ne, pimi kome naga naŕa pisuar ke ninuna la olua kiena ne Ntewa amio kana verue ne la olua.

“ ‘Naga pisa pan amiu sanini, sape “In na nekilia ruru kiamiu yuŕaena lala. Amiyeluar amiu paŕisi, asape kam na suŕare tai naŕa mal ruru po, ana peraga, in na nekilia ruru paŕisi kam na amare ga aŕeke na. <sup>2</sup> Nagane pe pogos naŕa kam na akirava towe narui. Kiamiu yuŕaena lala, in na noŕal sane e visuena kiena ne Ntewa, kam na pe akila make ruru re poli, a kam na akila pe po re nenaga. Kiamiu kapi pe kovio make re poli wa, ana naga suŕa panon ke naŕa lavis mare narui, ana komin sur ne nanene, nepisa ruru pan amiu nesape kam na monar ayuŕaen ruruia vena imi wo sina.

<sup>3</sup> “ ‘ “Visae ve sanene, kam na monar asitoŕal si visena wo la naŕa amloge, a amla rui. Alogear ruruia, a avilon kiamiu malena wasuŕe si na, komin naŕa visae ve atavilo re, nekilia nevisa nena van amiu sanini, yoko neim noŕalivin amiu sane yar na vinauen tai naŕa kam na taŕatete akilia.

<sup>4</sup> “ ‘ “Ana lelaga, nekilia nesape kam nae Satis, kam pe moki re poli naŕa asuŕa pogaga, naŕa pe akila re ŕala kulsota la namname poli sane laŕasia. La ke narui amekiki ruru nenaga, ana yoko ayen sur yuwowo, ayaloro amio inu meva e kiau yo. <sup>5</sup> Yar a naŕa taulu naviowaena, naga ŕena yoko ayowa ruru wo e kulsota yuwowo la ne sanene. Naga, kiena kia taŕatete nena

---

**3:3** Mat 24:43,44; Luk 12:39,40; Nakilol 16:15      **3:5** Nakilol 20:12, Mat 10:32; Luk 12:8

neyumulua e tus namalena pogos tai, ana yoko nekilogia naga va Ata amio kiena navisi lala, nevisave yar nene naga pe kiau yar lelaga nena napo.

6 “ ‘ “Yar naþa kiligana teke na, popon naga loge kilia ya naþa Ninuna ne Ntewa sumña pisawal ke pa þegas nen li nalelagaena lala.” ’ ’ ”

*Mak na orai, naga pa e sumñare nae Pilatelpia, naga sumñare naþa pulmas wo na kilaen yuñæna sike e marana*

7 “Monar osiri si mñak va va navisi na sumñare na pulkumali naþa Pilatelpia, ovisa sanini, ovisave ‘Visena naþa pimi pan amiu ne, pimi kome naga naþa pe wa, a pe lelaga, naþa naga ke narui naga þar ke ki na kiluaen pulutava mñana Parin Suþe Tepet nanua. Ya naþa naga vietavania, taþatete si yar tai kotawea, a ya naþa naga kotawea, taþatete si yar tai vietavania.

8 “ ‘ “Naga pisawal pan amiu sanini, sape “In na nekilia ruru kiamiu yuñæna rui. Ana monar avisu ruruia, in na nevietava e pulutava tai van amiu naþa yar tai taþatete si kotawea. Nekilia mña naþa kiamiu mñareraena ve tokak ga, ana nekekara paþisi naþa apuarar ruru ke kiau visena, a pe akila kare re kiau kia naþa teke e amiu poli.

9 “ ‘ “La naþa ataveve ke Yermare, la apa ke lele taaga vena avisirlua kiela þegas, a la apisa ke asape la ape le Yu nena napo, ana pe sa re nene poli, apisokan ga. Ana siraunia yoko nekila la nene aim akinai e lamiu vena avisu kilale sane pe kiau sitomiena su re e la poli, ana sike ga e amiu.

10 “ ‘ “In na nepisa m̃a pan amiu nanua rui nesape monar asum̃al m̃arera amio sitomen la naṣa piayavi silaga, ana nepisu sane apuarrar ruru kiau visena nene. Komin sur ne nanene narui, nekilia nevisaar van amiu sane visae pupia naloge viowaena yoko imi e yomarava vena kilali la naṣa asike ea, ana yoko in na nesuwo amiu ruru nena ga, yoko sur nene taṣatete tol amiu.”

11 “ ‘ “Ve ve piavi re, neimin amiu sina. Ya naṣa asum̃al asike e rui, monar auarrar ruru m̃a vano-o neim noworun amiu, ana yoko akilia ala kiamiu nalaena, ana taṣatete yar taṣena kilia warlua kiamiu karo na ṣarimiu naṣa pe kol vetan amiu. <sup>12</sup> Yar naṣa taulu nakilaliēna make ga vano-o neimi, yoko noure naga imi sane pupia kemraṣe na loyumũa e yumũa wa m̃ana Ntewa, yoko yar nene sulue sike loyumũa nene narui. Yoko neyowauia naga amio kia la naṣa nesiri se ea, sane kia kiena ne kieta Ntewa, a kia kiena ne pupia pulkumali, na Yerusalem viu, naṣa mligan ma e peni kiena ne kieta ne Ntewa pitomi, a amio la nene, yoko nesiri m̃ena kiau kia viu ea.

13 “ ‘ “Yar naṣa kiligana teke ea, popon naga logekilale ya naṣa Ninuna ne Ntewa sum̃a pisawal ke pa ṣegas nen li nalelagaena lala.” ‘ ‘

*Mak na olua pa e sum̃are nae Laotisia, naga sum̃are naṣa pa piowa rui, ana pe asitom re sur poli*

14 “Na maro, monar osiri m̃ak van navisi na sum̃are na pulkumali naṣa Laotisia, ovisa sanini,



ovisave ‘Visena naña pimi pan amiu pimi kom pun naga naña pe p̄arin sur make ga, naña naga ga kilia visave “Sanene.” Naga masisu pona pe lelaga e Ntewa vano tol naña kana kuruta mlau, a naga pe suñen wetelun yomarava naña Ntewa siia.

<sup>15</sup> “ ‘Naga pisawal pan amiu sanini, sape “In na nekilia ruru kiamiu yuñnaena lala, a nekilia nevisu kilale sane pe kiamiu sitomena la manin manene re poli, a pe pisun manene ruru re m̄ena poli. Popon manene la naña visae sinoñan omanini, ko omanin ruruia, pona visae ovisunu, ovisun ruruia, ana naña sinemiu la peve lua ga sanene, p̄elaga nene pe sineun re nenaga.

<sup>16</sup> Ana komin naña sinemiun amanini a sinemiun avisun sanene, in na nesape neluelua amiu e logou narui.

<sup>17</sup> “ ‘ “Kam na asape amiyuwon polo kiamiu sur wo la mokliu, ana kam na asape tañatete yar tai kilia la sur van amiu, kam na amla ke rui. Ana peraga, e kiau navisuena pe sa re nene poli. Kam na pe apisu kilale amiu re poli, ana pe kiamiu sur wo re nena tai, kam na limamiu koren ga, kilamaramiu p̄ala, a yepemiu mian ga. <sup>18</sup> Nevisa van amiu, popon awasuñe si aim pun inu, aim awar kol nini naña kap kekan van kana namname rui, vena akilia alarar sur wo tai e limamiu. A popon aim awar kulmrae la naña miyuwowo, vena akalo amiu, vena ve amawa re, a popon aim awar m̄aki na vilanen e kilamaramiu, ana vena akilia akirava sina.

<sup>19</sup> “ ‘ “Yaru ai naña sineu siia, monar nevis

vania vena nakawe ruru kiena malena, ve sanene, monar ala kiau visena lala, ana avilopu amiu. <sup>20</sup> Ayagogo ruruia! In na nesuñal nesuñã nesigariga ke pulutava na kioñã malena. Ko naña ologe pulgou pio, ovieta van inu, neiñasu loyũã italuã tesun, italuã tekinana.

<sup>21</sup> “ ‘ “Naga naña suñal ñarera vano-o taulu naviowaena lala, netañan vania sane naga topae amio inu e leleu wa na totanoena, sa ke ga naña in ñena netaulu kiau nasinekar, ana siraunia Ata ñere inu netotano ke nemio e lлена wa na totanoena.

<sup>22</sup> “ ‘ “Yar naña kiligana teke ea, popon naga logekilale ya naña Ninuna ne Ntewa pisawal ke pa ñegas nen li nalelagaena lala.” ‘ ”

## 4

### *Ntewa na lлена naña meta manene laa ma e peni*

<sup>1</sup> Pogos naña nepisu pae sur la nene, noñal ke sina ga pulutava tai navaen loyũã ma e peni, ñeke ga vamon inu. A nemloge ke sina ga pulgo naña pis pan inu nanua, pis na pulgona miyelu keviu sane kumasua, ana pisa pan inu, sape “Ovam meta e nini sumo wa, vena nekila ovisu sur la naña yoko aim sirau.”

<sup>2</sup> Pisa sanene, ana veraga ga, nemloge sane Ninuna ne Ntewa ñerelua ninuu, mligan inu ma e peni, ana nekira pa e pupia lele wa na totanoena tai ñeke ga e marau, naña yerka wa tai totano teke ea. <sup>3</sup> Nepisu sa naña pila, ñar maran kilavaru la naña po na po, a kana kap

nena miyervivia sa ga kuperierier. <sup>4</sup> Kana pupia lele na totanoena nena m̃eke ga lika, a lele na totanoena m̃ena laṣasa miyervivia, nopuloia tol lualima yam lua pa vari [24]. E la peve taaga, yar taaga teke e tai kila sane la m̃ena tol lualima yam lua pa vari [24], la nene ape nasumonena nae ma e peni lala. La nene, m̃ala kulsota la miyuwowo paṣisi, a amien karo na ṣarila naṣa pe kol. <sup>5</sup> Nesum̃a nepisu ke sane, nemilan m̃ena yekarpla ke ga likan yo wa naṣani, amio m̃aagena na pupia polilu tera ke ea. Vamonia, kap vivaga la olua asum̃a apivavaga, naga nene nane ninuna ne Ntewa olua, <sup>6</sup> asm̃al asike e yotop tai, naṣa meri ga m̃eke na sa ga sive, pilavila a merarava ruru po sa ga kupito.

Ana likan yo naṣani, yar mali la vari asum̃aga, naṣa kilamarala la moki liu sike vamon la a varaun la, asum̃al lavisi, asuvivi pupia lele wa na totanoena.

<sup>7</sup> Yar mal ṣes nene, sa ga laion, na lua sa ga puluk naṣa purwolu, na telu naga ṣar ga maran yaru, na maro na sane pepaum̃a. <sup>8</sup> La nene, la make ga kupela la orai, naṣa kilamarala la kalo make ruru m̃ena kupela la nene, pa m̃ena e pulugala.

La nene kiela yum̃aena, legiena a yemalo, la pe aparurula re pog ta poli, la asum̃al apisawal lue ga, asape “Ntewa na m̃areraena na mava, naga su ṣesa, naga sike nagane, a naga sike sike nena. Naga pe wa naṣa pe wa, naga pe wa paṣisi.”

<sup>9</sup> E visena la ne sanene, la asumña apisirlua ke kia kiena naga naña totano teke lele wa likan la, apatanon ke naga, asumña apisa ke potena pa naga naña yoko mal lue narui. Pogos naña asumña apisa mña, <sup>10</sup> nasumonena mña la nene apatanonia, amlotun ke naga naña tařatete mare pogos tai. Ana siraunia, ařar plan kiela karo na řarila naña pe kol, amligan su tano se lana, asape:

<sup>11</sup> “Kiamim Suře Ntewa, mesmesun naña nau-rarena, navatanonena a namãreraena make ga, ala van ko, kionña ko ga taaga. Ko ke naña osii make sur narui, e ga e kionña nasinenanena atol kiela malena rui.”

## 5

*Tus naña apulonaria, amio narin sipsip, naña lalua asike ma e peni*

<sup>1</sup> Ana yokorena nepisu si yerkawa nene naña totano teke e lelana wa, naga mlarar ke sur tai e limana marua, sur nena naga tus tai, naña asiri ga e lepas luwoka, řisi na apulonaria, ana atelan kana lok olua suwoia.

<sup>2</sup> Ana nemloge pupia navisi tai pion manene pa metava, piunia pisape “Ane torokin kilaroro lok la nene? Yar tai sike ne kilia vae tus nene woga pona peraga?”

<sup>3</sup> Momña ga sanene pano-o, peraga, pe yar re tai naña ma e peni pona yomarava, pona vatanon yomarava, naña kilia vae tus nene poli, pe yar re nena tai naña torokin kira va loyumña e poli.

<sup>4</sup> Nepisu sanene narui, nemloge piowa, netagi na netagi, naña tařtatete yar tai kila.

<sup>5</sup> Ana nasumonena la tai nene pis pan inu, pisape “E, ve otag re sina! Opisu ke ne, nanene naga laion naña molue kome yeririna la nae Suta, naña apio asape lus kiena ne Tepet, naga taulu make sur la řisi rui. Naga ke narui naga kilia kilaro lok la olua nene, naga ke naña yoko vae tus nene narui.”

<sup>6</sup> Ana nekira pano, pe laion re poli, ana nepisu narin sipsip tai suńal sike likan yar mal la vari a nasumonena lala vamon yo wa nene. Naga pe narin sipsip ga, ana kana lamńaliu olua amio kilamarana olua asike e řarina. Naga suńal sike na, naga apisu sa naña akila kuřařaena e rui, ana mal ruru ga suńa ga. <sup>7</sup> Naga mial pimi, kuslua tus naña petan limana yerkawa na řamarua, metava e pupia lele wa na totanoena.

<sup>8</sup> Mla pae, ana yar mal la vari nene amio nasumonena la lualima yam lua pa vari [24] nene amloru e lana. La peve taaga ařar kiela yukalele lala a kiela piala la naña amiyuńaen e kol, pulen ga ponotaninu la naña asikapia, ana kala ponos taninu po pařisi naña pa ke metava, nane leniena lala kiena nalelagaena wa lala. <sup>9-10</sup> A la amiyaun ke yau viu tai naña sanini, “Akuřařain ko,

ana e komńa kuruta  
 opul plan yeririna lala ape kiena ne Ntewa,  
 naña amolue e řegas nen yeririna make ga,  
 e visena kar make ga,  
 e purvanua kerkeviu make ga,

a e narin purvanua make m̃ena ga.  
 Ko osikol la apim ape p̃egas taaga navatanonen  
 p̃arin sup̃e ve taaga ga,  
 aim ave yar wa lala na yuṃaena kiena ne Ntewa,  
 naṓa yoko ave suṓen yomarava nini.  
 Ana komin naṓa okila sanene,  
 torokin sane ko ga taaga ola tus nene narui,  
 owar plan kana lok lala, ovae.”

<sup>11</sup> Nesuṃa nepisusu ke sanene, ana nemloge  
 navisi la amiyau, la mok na moki, aṃa la tenario  
 via na sanene. Amiervivi lele na totanoena  
 wa amio yar mal lala a nasumonena la nene,  
<sup>12</sup> amiyau m̃arera paṓisi, apisa sanini, asape,  
 “Narin sipsip, naṓa akuṓaṓainia,  
 naga taaga po na po.  
 Nam̃areraena make ga, nawoena make ga,  
 manmaruaena make ga, puriu kawaena make  
 ga,  
 navatanonena make ga, naurarena make ga,  
 nayeluarena make ga,  
 torokin akila ga van naga taaga.”

<sup>13</sup> Siraun nanene, nemloge si surmal make ga  
 la m̃ena amiyau, surmal la naṓa asike ma e peni,  
 amio la naṓa asike e yomarava, pona e porotano  
 pona e sive, kiela yauena pisa sanini, pisape,  
 “Nayeluarena, navatanonena, naurarena, a  
 nam̃areraena va va yerkawa naṓa totano  
 teke e lele wa, amio m̃ena narin sipsip,  
 vano vano ve uro re.”

<sup>14</sup> Ana yar mal la vari naṓani apisawalia asape  
 “Sanene” komin visena la nene, ana nasumo-  
 nena lala amloru, akinai, amlotun lalua.

## 6

### *Lok la olua na tusi naña aplonaria*

*Lok ñesia: Yerkawa na ñelaga na kilaen mara, naña kus wosi yuwowo*

<sup>1</sup> Nepisu manene m̃aga, nepisu narin sipsip naña kilaro lok na sumo na tus nene. Naga kila pae, ana yar mal la vari nene tai pio e pulgo tai sa naña polilu, pisape “Oimi!”

<sup>2</sup> Ana nom̃al ga wosi tai naña miyuwowo sum̃al sike e marau veraga. Nom̃al yar tai teke meta ea, ñar ke viu lamias, ana la amligan karo na ñarina kiena ñarin suñe teke e ñarina, ana kus kiena wosi nañani kirir pano sane yar namara tai naña vanon vena taulu kiena nasinekar lala.

*Lok na lua: Yerkawa na ñelaga na weñaren yaru, naña kus wosi pivaga*

<sup>3</sup> Yoko narin sipsip kilaro lok na lua. Kila pae narui, ana nemloge yar mal na lua pio, naga m̃ena sape “Oimi!”

<sup>4</sup> Ana wosi tañena ke sina ga pimi kate veraga, naña pivaga. Yar naña kusia, atañan pania vena va war plan sum̃arena naña sike e yomarava, vena yar la asum̃a awewe moñar la. Amligan pupia playu na mara tai e limana, ana naga m̃ena kiriri pano.

*Lok na telu: Yerkawa na ñelaga na visoena e yomarava, naña kus wosi malko*

<sup>5</sup> Yoko, narin sipsip kilaro lok na telu. Kila pae narui, nemloge yar na telu pio, naga m̃ena pisape “Oimi!”

Ana nepisu ga wosi si tai naña malko suñal sike e marau veraga. Yar naña kusa, naga mlarar ke skel tai e limana, vena visuveve kinanena lala kana yeririna na yomarava.

<sup>6</sup> Ana nemloge visena tai molue ga likan yar mal la vari nañani, asape “Ovano, atañan pan ko asape okilia okila naña yo ve plasan kinanena, naña yoko monar aul narin kinanena ga e kilayaru keviu. Ana ve okila kare manene re purpes nen purolip lala naña amiyumãen ke sirveve e mrasnela, a ve okila kare manene re purpes nen kilkerep lala naña amiyumãen waen e mrasnela.” Apisa sanene narui, a naga mña kiriri pano.

*Lok na vari: Yerƙawa na ðelaga na marena, naña kus wosi na yepen pe yavi*

<sup>7</sup> Yoko, narin sipsip kilaro lok na vari, kila pae ana nemloge yar mal na vari pio, naga mña sape “Oimi!”

<sup>8</sup> Ana nomal ga na wosi tañena naña yepena pe yavi suñal ga sike e marau. Yar naña kusia, apio kiena kia asape Marena, a naga, kiena erau tai mial ke amio, naña kiena kia asape Pulukapi. Ana e lalua nene, atañan asape lalua akilia akila viowa va yar ve moki e yomarava, e playu na mara, pona e viso, pona e maiena, pona e surmal tetan lala. Visae ve sanene, yar la vari asike yomarava, la telu akilia asururu ga, ana tañena tai akilia akilapel naga sanene.

*Lok na lima: Li na lelagaena la naña ape masisu pano-o añemoñar la*



<sup>9</sup> Yoko, narin sipsip kilaro lok na lima. Kila pae, ana noñal wonta pulen ninuna ne yeririna lala amiyuwon la miyervivi miasina. Nanene la naña añemoñar la komin añarera e logearen visena kiena ne Ntewa, a asuñal mñarera asape amlelaga e Yesu. <sup>10</sup> La nene, noñal atag ke pa Ntewa e pupia pulgo keviu, asape “Ake Suñe na sur make ga, ope wa a ope lelaga, awis ovisu kilale kamim kuruta nene. Pogwai naña yoko okila maran va yar viowa la naña akila ke piowa sanene?”

<sup>11</sup> Apisa pa sanene narui, ana añar kulsaket yuwowo la pan la amiyenia, ana apisa pan la asape sur naña la apiunia naga pere wa. Asape monar asuñate li ga ve plas ga wa, komin naña kiela erau lañasa asike ga wa, amio mña kiela puruvi tañena lala a vinela lala, naña yoko la mña monar awe moñar la komin naña amlelaga, ana pogos naña la punu ga aimi toroki, yoko Ntewa kila ga ya naña la apiun na wa.

### *Lok na orai: Legiena maro*

<sup>12</sup> Yoko, nepisu naña narin sipsip kilaro lok na orai. Kila narui, yemninu veraga, a pe piavi re poli mrae pimi malko yemalolo nenaga, a kupario pimi pivaga sane kuruta, <sup>13</sup> a verue la naña asike ma e sinapane akekapil apitom tano e porotano, sa ga naña mralak mene, pogos naña pupia lagi miyui kululun lasa. <sup>14</sup> Yoko, avilonar sinapane sa naña apilonar takue akus pano, a

---

**6:12** Nakilol 11:13, 16:18, Mat 24:29; Mak 13:24,25; Luk 21:25

**6:14** Nakilol 16:20

tavie make ga a purvanua make ga alen plan la vetan lelela lala.

<sup>15</sup> Ana pogos naña yar la avisu sur la nene, pupia marauena naña pupia marauena. Parin supe na yomarava lala, yerkaawa lala, nasumonena kiena ne yar na mara lala, yar na sur moki lala, yar m̄arera lala, amio m̄ena kiela yaru na yum̄aena lala, a yar taņena make ga e yo kar ga lala, la make ga ayalin mesmesun puluve lala pona pulkilavaru, avavinin yo la metava e kunusa, akilayonli naña atapolou ea. <sup>16</sup> Atol yo la nene, ana marauena pimi keviu manene laa, a apion pa kilavaru lala amio kunus lala, asape “Awis, aloru akalo ruru imimi, vena navisueña kiena ne naga naña teke meta e lele wa ve tol imim re, a vena nasinekar kiena ne narin sipsip ve kila kare imim re. <sup>17</sup> Pupia legiena na sinekar kien la lua nene pimi rui, a yoko ane kilia suñalu mali e pogos nene? Peraga ne, nagane yoko viowa manene laa van ita make ga.”

## 7

*Ntewa pisaar kiena pupia p̄egas nen yeririna tai vena ave kiena*

<sup>1</sup> Siraun sur la nene, nepisu navisi la vari asuñal asike e mrapun yomarava varoka, asuñã akilawo ke lagi vari naña amiyui ke e yomarava, vena lagi la nene ve ayui re si e sive, pona e porotano, pona meta e lak lala. <sup>2</sup> Yoko nepisu ke sina navisi taņena, p̄ar sur na ween totou kiena ne Ntewa mali van kiena yeririna lala, ana naga molue e naña mrae pa meta ea pimi.

Naga kilia m̃a sape navisi vari nene, la aṗar ke nam̃areraena naṗa akilia akila kare porotano a akilia akila kare sive, ana naga pion manene pan la, pialuṗar pan la vena ve akila re si sur tai. <sup>3</sup> Pisa sanini, sape “Ei, toko, ve akila kare re sive pona porotano pona lak lala, vano vano tol naṗa teligan totou tai te piamenan yar mesmes lala naṗa ape kiena ne kieta Ntewa.”

<sup>4-8</sup> E pogos nene narui nemloge ga na wa naṗa apisawal nena maran la naṗa amligan totou e la. La nene amolue akom e lus nae Israel la lualima taaga pa lua, naga lus la naṗa aṗar kia kiena yermarua apua kan la nene, nane Suta, Rupen, Kat, Asa, Naptali, Manasa, Simion, Levi, Isak, Sepulan, Sosep, a Pensiman. Ana e lus make la nene, tai kana manu lala tol lualima taaga pa lua [12,000] amolue komea, kila la punu ga tol sane kana manu ne lala tol ponotia lualima yam vari pa vari [144,000].

*Pupia ṗegas taṗena lala naṗa amiyaen kulsota yuwowo lala*

<sup>9</sup> Ana siraunia, nekira pa vamon inu narui nom̃al pupia ṗina na yeririna lala, naṗa moki na moki, taṗatete auloia, la ke naṗa amolue akom e lus taṗena la narui. La ke naṗa ape yeririna taṗena lala na purvanua taṗena lala, amio kiela visena taṗena lala, apim̃ asum̃al asike vamon pupia lele na totanoena naṗa narin sipsip totano teke ea. La make ga amien kulmrae yuwowo nowo lala, a aṗarar m̃am̃ela lala, <sup>10</sup> a apio manene pa metava, asape “Kieta Ntewa teke

e kiena lлена wa, naga ga amio narin sipsip, lalua ape purþes nen kieta natamaliaena.”

<sup>11</sup> Ana amio la nene, navisi mēna lala asuñal amiyervivi yo wa, a amiyervivi mēna nasumonena lala amio yar mal la vari naþani, ana la mēna akinai aþan þarila pito tano vamon yo wa, amlotun Ntewa, <sup>12</sup> asape

“Ee, lelaga pa!

Nayeluarena make ga, a naurarena, a namanmaruaena, a navisaen potena, a navisirluaena, a puriukawaena, a namāraena, la punu ga nene ape kiena ne kieta Ntewa naga taaga, a yoko ve sanene sulue na sike ne.

Yeluaren van Ntewa!”

<sup>13</sup> Ana e pogos nene, nasumonena la tai piuntan inu, sape “Pupia þina naþa amiyen kulumrae yuwowo la ne, okilia osape a la nene, a okilia osape la asu pe na apimi?”

<sup>14</sup> Ana nesape “E peraga, ana ko ope yerkawa nae e nini tai, ko okilia mā yo?”

Ana pisatamea sape “Ore, la ke nene narui naþa aþaro e pupia pogos naloge viowaena. Kulsota la ne amiyen ke ne, akevanla e kuruta kana narin sipsip naþani, nane apim amiyuwowo ruru sane opisu ke ne. <sup>15</sup> La na kiela yuñena sanini, sane

‘La asike vamon yo wa kiena ne Ntewa, legiena a lemalo amiyuñae kiena ke loyuma e mana yuma wa,

a naga naþa totano teke meta ne, naga yoko visuar la,

<sup>16</sup> Yoko taþatete si viso kar la,

yoko ve moto karla re si narui,  
 mrae ve kila kare la re sina,  
 a pupia kapi ve visun la re sina,  
 17 komin narin sipsip naña teke likan yo wa meta  
     ne,  
 naga yoko vagan la,  
 naga yoko sumon la ava e purþes nen wii na  
     malena,  
 a yoko Ntewa yumu plan make wamarala.' "

## 8

### *Lok na olua: Yo pa ruru nenaga*

<sup>1</sup> Siraun nene, nepisu narin sipsip kilaro lok na olua. Kila narui, sur make ga nae mae peni aparurula veraga, pe mñaagena re si ta poli, yo mñano nena ga mon mña pano-o tol komsus nen aora taaga.

### *Kumasua la olua*

<sup>2</sup> A pe yam piavi re nenaga, nomñal navisi la olua naña asuñal asike e marana ne Ntewa vena kilaen kiena yuññaena, a amla kumasua olua pan la, tai kus tai, tai kus tai.

### *Pias nen ponotaninu naña amiyuññaen e kol*

<sup>3</sup> Ana siraunia, navisi taþena pimi. Naga kus pias nen ponotaninu tai, naña amiyuññaen e kol, a naga kus pimi suñal sike e wonta, naña naga mña amiyuññaen e kol, a naña sike vamon lele wa na totanoena. Ana aþar ponotaninu mokliu pania vena sikapia e wonta vena kila ponos wo, a amla mña leniena lala kiena ne nalelagaena wa lala pania, vena ligan to meta e wonta sane nalaena tai. <sup>4</sup> A pogos naña kapi nene kekan

ke ponotaninu nena, kana ponosa amio leniena kiena ne nalelagaena wa lala, amolue petan limana ne navisi nañani akaka ava atol marana ne Ntewa.

<sup>5</sup> Yoko, navisi nañani ñar plategkap lañas naña apranar sike e wonta nene, kokonia pito e pias nen ponotaninu nene ana koven pito tano e yomarava. Ana pogos naña suri nene tol yomarava, kila polilu kapur kar ga e yo punu ga, amio kana mumuena sa naña kapiapo, amio mña yekarpla, a yemninu.

*Kumasua na miyelu ñesa: yua amio kuruta*

<sup>6</sup> Ana navisi la olua naña añarar kumasua olua nene, asu ruru ke naña asape ayu narui.

<sup>7</sup> Navisi na sumo miyu kiena kumasua, ana kila narui mrayua la naña ñarera sane kururu kilavaru, amio kuruta naña pisusun sane kapi, aptom akila moñar sur kar la e yomarava. Amiyumñen ña sanene pano-o kapi kekan make yomarava komþasa amio kana purlaki ne lala, amio sur make naña kapur sike ea.

*Kumasua na lua miyelu: tavie na kapi*

<sup>8</sup> Ana siraunia, navisi na lua miyu kiena kumasua. Nanene kila pupia tavie kar tai, naña kap molue ke komea, akovenlua pito e sive. Pogos na kove sive, ana sive komþas pimi sane kuruta, <sup>9</sup> ana kana sur mal ne lala amarmare, a waa la naña asike e pupia lepas nene atalilu.

*Kumasua na telu miyelu: verue naña kirir ma e sinapane*

<sup>10</sup> Yoko navisi na telu miyu kiena kumasua. Nanene kila pupia verue tai, naña kapi pivaga ke ea tegoli yo sane kapi vivaga, molue ma e sinapane, miere pitomi miae yomarava. Ana kana kapi nena pa tol wii la naña mlau a ãarin wii lala. <sup>11</sup> Kia kien verue nene, asape Wii Melkalka, ana kila narui wii nae yo la moki pimi melkalka, ana yeririna la amun ãele ga, moto karla ña pano-o amarmare.

*Kumasua na vari miyelu: yemalolo*

<sup>12</sup> Yoko navisi na vari miyu kiena kumasua. Nanene kila naña mrae komãas pimi malolo, a kupario komãas pe tego re si poli, a verue la moki naña pe añal la re si poli. Kila narui legiena pimi plas manene laa, a pe lepamiema re si poli, kila narui yemalolo pañisi e yomarava wetelu.

<sup>13</sup> Nepisu manene ke sane, noñal pupia pepaumña tai ka ke metava, sumña mlolokai kar ke metava na, pisape “Yo piowa rui e, ana na nene naga kulus ke na wa. Navisi la telu asike ga wa, la kiela kumasua miyelu ñarera manene laa sane. Kam na yomarava, avisuar ami, pupia na loge viowaena pimi ñaliv ke narui!”

## 9

*Kumasua na lima miyelu: pulus naña pito manene laa tano, naña na ãesia na loge viowaena ñarera na telu*

<sup>1</sup> Yoko navisi na lima miyu kiena kumasua. Nanene kila verue tañena kirir ñalia ãarpoyo ma e sinapane pitomi e yomarava. Verue nene,

amla ki tai pania, nanene ki naña vietavan pulus naña pito tol kap naña garo tano. <sup>2</sup> Pogos naña mlalua keplamaran pulus nene, kapi piu þar wowo yo molmolue ke ea, sa naña pupia kap tai piu, ana pa kar ga meta e sinapane, kilawo maran mrae, kila yemalo ke sina ga. <sup>3</sup> Ana pogos naña kap piu kalo make yo sanene, kelsisi la amolue apitom tano e porotano, ana pe asa re si kelsisi poli ana apim sa naña pupia kimi natano.

<sup>4</sup> Apisaluþar la asape ve atol re purlaki lala a kinanena lala pona sur la naña pitotovi sike e yomarava, ana atamñan asape akilia akila viowa va yeririna na yomarava lala, la naña pe aþar re totou kiena ne Ntewa naña naga mligan sike nena e piamenana ne kiena yeririna lala. <sup>5</sup> Kimi na tano la nene, pe atamñan la re naña akilia awe moñar yar la poli, ana atamñan la ga ayuyur la ña va tol kupario ve lima. Ana pogos naña akila ña sanene vano-o, yoko yar la aloge yepela la lalae kar vano vañisi. <sup>6</sup> E pogos nene, la ve moki na asave popon amarmare ga, yoko akale mrapa la naña amare ea, ana yoko marena yepen mavin la, ligan la asuña ga sanene.

<sup>7</sup> Ana kelsisi la nene, pogos naña nepisu ruru la, atorokin wosi la naña yar namara la akus ke ne. Amyen karo naþarila naña pe kol suwo þarila, a pogos naña nepisu ruru marala, nemilan la ga asa ga yaru. <sup>8</sup> Amñe vilþarila sane sira, ana maluela lala, sane na maluena laion. <sup>9</sup> Amyenwo yerela lala e pototo, a pogos naña akaka tetai, kupela la kakapur ñalia sa naña wosi la naña aþere kiela kat lala akiriri ava akila



mara. <sup>10</sup> Kelsisi la nene kesila sike e la, a sur na yuren yaru lala sike e la, naña akilia ayur mña yar vano-o tol kupario ve lima.

<sup>11</sup> La kiela þarin suþe tai, naga navisi tai, ana pe navisi kiena ne Ntewa re poli, naga navisi naña pisuar ke mratava na pulukapi. Yar nene, kiena kia e visena kiena le Epru lala, asikia asape Apatono, a e visena nae Krik, asikia Apoliono, kinas nen kia lua nene asape yar na warnena kareen suria.

<sup>12</sup> Kelsisi ne la nanene, naña nasumo e naloge viowaena la telu nena nanene. Nomñal naga þaro pa rui, ana lua sike ga wa.

*Kumasua na orai miyelu: navisi lala na weñaren yaru, naña nalua na naloge viowaena ñarera na telu nene*

<sup>13</sup> Yoko navisi na orai miyu kiena kumasua, nemloge visena tai molue kom e mrapun wonta wa nene varoka naña amiyumñan e kol naña sike e yo wa vamon Ntewa. <sup>14</sup> Visena naña pisa pa navisi nene sanini, sape “Navisi la vari naña apiar la asike e yo naña wii mlau ke ea naña kiena kia Yupretes, nagane kana pogos naña ova okila plan la sina avavano narui.” <sup>15</sup> Navisi la nene, apuarar la ruru asumña sanene pano-o tol nena kana aora na kana legiena na kana kupario, naña akilia amolue ea vena akila kiela yumñana. Ana navisi taþena pa mluþar plan la, kila sane amolue apano, apa kar ga e purvanua lala añe yar lala lavis tol komþas nen yeririna na yomarava.

<sup>16</sup> Apa amio kiela yar namara lala naña akus wosi namara lala, ana nemloge apisawal kana

marana tol tenario tol ponotia lua [200,000,000].  
<sup>17</sup> A pogos naña nepisu manene wosi la nene amio yar la naña akusia, nomāl pototo sur tai naña amligan mono ke yerela, amiyowa ruru la apivavaga sane kapi, amemaena sane lowe memaena, amleleru sane mrae. Kiela wosi lala ape tañena ga, naña ðarila sa ga laion, a pogos naña amiyuveve nomāl kapi a m̃au a posnoyavi na kapiapo mleleru molue petan logola. <sup>18</sup> Sur la telu ne nanene, sane kapi a m̃au a posnoyavi na kapiapo kila lavis yeririna na yomarava nini la komþas akokovio e pogos nene. <sup>19</sup> Namãreraena kien wosi la nene sike e ya naña molue ke kome logola, a sike m̃ena e kesila lala, komin kesila la pilolon sane lomãara, a sur sane ðarin lomãara m̃ena sike e luas nen kesila naña mla ke pupia magka pa yeririna lala.

<sup>20</sup> Napiowaena la ne m̃arera pañisi sanene, a pupia komþas nen yeririna lala, nane laþas naña amal ke na wa, pe asitom re poli. Pe apulon la re nena e kiela napiowaena la naña akila ke e limala poli, ana asumã akila luen ga lotena pa yermare lala, a asumã akila ke leniena pa nono lala na kiela ntewa lala, naña pe akirava re poli, a pe amloge kilale re sur poli, naña pe amiyal re poli, naña yar ga la amiyumãen e kol, pona selpa, pona pototo, pona kilavaru, pona laki.

<sup>21</sup> A amio m̃ena nanini, pe apulon la re nenaga e ðelaga na wemãaren yaru poli, pona kimi lala, pona nakilaen viowa amio sira, pona e kiela vinauena la naña asumã akila ke ne.

# 10

## *Navisi tai mlarar narin tus naña apilonaria*

<sup>1</sup> Ana siraunia, nepisu si navisi m̄arera tañena molue ma e peni pitomi tano. Naga mien lul sa naña m̄ana kulsota, a kuperierier miervivi ðarina, marana m̄ena ga sane mrae, ana lana luwoka sane pupia kemrañe ana ape kapi. <sup>2</sup> Ana nepisu naga tarar ke narin tus tai, naña pike ða teke e limana luwoka. Ana piañereren lana marua piawa ke e sive a lana m̄el piawa ke e porotano. <sup>3</sup> Naga suñalar ga suña sanene, ana mligan pupia vioena tai naña sa ga laion, a pogos naña naga kila, polilu make kar ga lala apisatam̄e pimi, apis kome kiela mumuena lala. <sup>4</sup> Pogos naña polilu la atera sanene, sineun nesape nesiri plan kiela visena lala, ana lavis nekila narui, visena tañena molue ma e peni pitomi pan inu, sape “Toko, ve osiri re visena kiena ne la nene. Sur la naña apisa, pe nakilaen re yeririna la akilia poli.”

<sup>5</sup> Visena nene sanini, ana nom̄al ga navisi naña piawa e sive amio porotano, kian limana marua pa ma e peni. <sup>6</sup> Ana pisa kiena visena m̄arera tai, pisaar e kia kien naga naña mal sulue, naña sii peni amio ya la naña asike ea, amio yomarava a ya la naña asike ea, amio sive a ya la naña asike ea. Kiena visena pa sanini, sape “Nagane pe pogos na suñateen re si poli! <sup>7</sup> Lavis ke navisi na olua nene yu kiena kumasua narui, a visae kila ga rui, vera na nasitomwanena kiena ne Ntewa la imi m̄alivi rui, vera na sur make ga imi

merarava ve sa ga naña naga pisawal ñesan pa navisawalen la naña amiyuñae kiena ñesa.”

<sup>8</sup> Pisa pa sanene narui, in ñena nemloge visen tañena molue ma e peni pitomi pan inu, sape “Narin tus naña pike teke e limana ne navisi naña suñal sike e sive a porotano, ova ola ke ne wa.”

<sup>9</sup> Ana nepa lavisin navisi nañani, nepiun narin tus nene tania. Ana tañan ga pan inu, sape “Poga, okilia olavia. Visae olavia monar okania. A nesape nevisa van ko sanini, pogos naña okania, yoko ologe kiki e logomña vañisi, ana siraunia, yoko ologe melkalka e mopomña.”

<sup>10</sup> Ana nemlavia nakania, ana kiki e gou pañisi. Ana nesinom pae, ana sanena naña pisa, naña sur nene melkalka, kila kare ñeñeu pañisi.

<sup>11</sup> Yoko, visena pitomi si pan inu yam tai, sape “Yoko ve sa ga nene narui, komin navisawalena tañena la asike ga wa naña yoko monar oto ovisawal sina, naña apisayu ñegas nen yolai lala, purvanua punu ga, yaru na visena tañena la punu ga, a ñarin suñe la naña asike e yomarava.”

## 11

### *Yar la lua na iilaaren visen kiena ne Ntewa*

<sup>1</sup> Ana e pogos nene amligan kiai tai te lumiau, asape neva nela totou na yo la ea. Asape, “Ova e yuñña wa ñana Ntewa, ola ruru kana totounena na keviu pa sanape, a ola totou na wonta naña sike loyuñña ea, a oulo ñena yeririna la naña akila ke lotena e yo nene, sane ña tol via. <sup>2</sup> Ana

kana pupia yo naña m̃eke vanua, naga ve ola re kana totounena, komin yum̃a wa nene kom̃asa yar la naña pe ape Yu re poli la yoko akusia. Wolawa la nene yoko aim ataulu pupia kumali wa nene Yerusalem, yoko aim loyum̃a ayalor kar ga ea sa naña la lelela, ana yoko akila ga va tol kupario ve lualima yam vari va lua [42]. <sup>3</sup> A pogos naña asike e nene, yoko yar lalua naña asuñal m̃arera asike e kiau visen lelaga aim añalivi. Lalua ayen ga kulupak sa naña m̃ala kulsota, a yoko avisawal kiau visena e siarena na kupario la nene va tol luasa, naña kana legiena nena tol manu ve taaga ponotia ve lua lualima yam orai [1260].”

<sup>4</sup> Yar lalua nene visena wa kiena ne Ntewa pisayu la nakonua rui, naña pisayu sape purolip lalua asuñal ga, pona naña pisayu kemrañe na kantel lua, naña luoka ga asñal asike e marana ne kieta Ntewa naña naga pe suñen yomarava wetelu. <sup>5</sup> A visae yar tai kilali naña kila viowa va lalua nene pogos tai, yoko kapi kilia molue e logola, yoko kilia kilapel ruru nena kiela nasinekar lala. Nane mrapa ne nanene naña visae yar sinenan sape kilam̃ar la, yoko naga ga kan ke sina kiena marena narui. <sup>6</sup> Lalua nene kiela nam̃areraena keviu liu, naña akilia akilawo sinapane metava vena yua tañatete kove e pogos naña apisawal visena kiena ne Ntewa, a akilia akila wii lala imi ve kuruta, a akilia akila naña sur viowa kar ga imi pona pogos m̃arera imi kila kare yomarava e pogos ya naña lalua asitom asape akila.

<sup>7</sup> Ana lalua nene, lalua ave navisawalen sanene vano tol pogos naña lalua akila yuññaena na sanene ñisi. E pog nene narui, yoko pupia sur mal viowa naña ñeke tano e pulukapi molue vamin lalua, a yoko kiena namareraena taulu la luwoka, kilammar la. <sup>8</sup> A yoko akoven tasnela ñeke likan mrapplepa e pupia pulkumali naña naga pulkumali ña nena naña kiela suñe naga ñena amemmaria meta e lak torovia. E nene, naña e ñelaga na visawanen suria, apisa kia na kumali nañani, pogos tai asape kia na kumali marua viowa naña Sotom, pona apio asape Isip. <sup>9</sup> Tasnela moma ga e yepisun sanene yoko ñegas nen yeririna lala, pona lus lala, pona visena lala, pona purvanua la aim avisu la, yoko avisaluñar la ve asinla re vano-o tol legien ve telu komsusa. <sup>10</sup> A pogos naña apisusu ña tasnena yar mare lua nene pano-o yoko apisa karela pañisi a apitalia kare la ñisa. Yoko asitoñal naloge viowaena lala naña navisawalena lalua akila pimi pa yar na yomarava lala, ana yoko akekara na akekaran naña lalua nene amare pa rui, yoko akila pupia ñañagena a yoko awarwar si nalaena lala van la vanonia.

<sup>11</sup> A pogos naña legiena telu nene komsusa ñaro pae, pe asin re luwoka poli wa, la amilan ga lagi na malena tai molue kome Ntewa pitomi tol maren lua naña ne, kila si la ga luwoka asuñal añararla asuñal asikena. Pogos naña yar la apisuia, amarau na amarau, <sup>12</sup> a pe yam piavi re poli, amloge pupia visena la kom ma e peni pitomi, pisa pan lalua, sape “Poga, amlua avam

metava narui.” Ana la ga luwoka apa metava veraga, akus lul lala apa atol ma e peni, naña kiela nasinekar lala apisu sane asuñalu wowe ga asikena, logola suwowo ga rui apis re si poli.

<sup>13</sup> A e ke e pogos nene, pupia yem-ninu, naña kila lepas nen pul kumali nene komņas, yuña make ga akekapil apororowa make nenaga, a yeririna la naña amarmare e yemninu nene tol manu olua. La naña amal ruru ga asuñaga la apisu ke sur nene, amarau kar ñan wa, ana apisu sane popon la ayeluar ga Ntewa nae peni komin kiena pupia ñareraena naña la apisu kilale ga na wa.

<sup>14</sup> Yemninu nene sur sane pupia naloge viowaena na lua ñaro narui, kana yam telu nena pere wa, yoko naga ve ve piavi re na imi.

*Kumasua na olua mielu: pogos na liñereena, naña kana naloge viowaena ñarera maro na teloka nanene*

<sup>15</sup> Yoko navisi na telu miyu kiena kumasua. Nanene narui kila pulgo la moki apisasawal ke pupia visena la ma e peni, amieluar Ntewa apisa sanini, asape

“Nagane narui yo punu ga naña sumo sike vatanon suñe viowa na yomarava nini, la asike vatanon kieta Suñe Ntewa narui, lalua kiena Navisaarena, a yoko naga ve ñarin suñen vano-o tañatete ñisi pogos tai.”

<sup>16</sup> A nasumonena ñena la lualima yam lua pa vari [24] amio la, naña atotano ateke e lelela

la naña pa metava, akinai tano vamon Ntewa, amlotunia, <sup>17</sup> asape

“O Ntewa keviu namareraena na mava, ko naña osu nakonua rui, ko naña osike nagane, ko naña ope na pogos la ne pimi ke ne.

Mepisa potena pan ko pañisi wa, komin naña oñarar kioña pupia m̄areraena rui, nagane narui osuñalu m̄arera e kioña nasuñenena.

<sup>18</sup> Purvanua make ga na yomarava nini sumo na sinela kar ko, ana pogos na kilologiaen kioña sinekar van la narui.

Nagane kana pogos naña yoko oliñere yar mare lala, a yoko okila kare yeririna la naña akila kare kioña yomarava.

Ana kioña yar na yuñena lala, naña navisawalena lala, amio kioña li nalelagaena wa lala, a la naña apatanon ke kioña kia, yoko awar kiela nalaena wo la e pogos nene, pe sur koren ga naña ape yerkawa lala e kioña yuñena, pona pe ape yerkawa re poli.”

<sup>19</sup> Ana e pogos nene apietavan yuñ wa m̄ana Ntewa ma e peni e marana yeririna lala, a añal pias nen navisaluaena wa mon m̄aga. Amilan ga yo pe tañena veraga, komin namareraena kiena ne Ntewa sike ea, naña yekarpla e yo punu ga, amio polilu tera, yo m̄aaga, yemninu, a pupia mras nen yua aes kekapili.



## 12

### *Sira nowo amio pupia nopi tai*

<sup>1</sup> Nepisu manene ke sur nae peni lala wa, ana nemilan ga pupia kile tai. Naga sira tai, naga kus mrae, mien pe m̃ana kulsota, suñal sike e kupario, a karo na p̃arina, verue lualima taaga pa lua [12] sike ea. <sup>2</sup> Sira nene m̃eṣena, ana mloge piowa mlokai na mlokai, komin kiena kupario p̃isi narui, lavis waria.

<sup>3</sup> Nepisu manene m̃a sanene, pupia surmali taṣena molue ma e peni, naga pe namarauena manene laa. Naga pupia arman nopi tai, pivaga, p̃arin olua naṣa amien karo na p̃arin suṣe olua sike e la, a lañaliu m̃ena sike e p̃arila, make ga tol lualima. <sup>4</sup> Ana noñal ga sur naṣa kuṣin kesina sane, ku plan verue la mokliu akekapil akowowo yo tano e yomarava. Ana sur viowa naṣani pimi suñalar se maran sira nene, naga sitom ruru rui sape sa sira nene war sisi, karm̃ar ke veraga.

<sup>5</sup> Sum̃a sanene pano-o sira naṣa p̃arlua narina, pe yerm̃ene. Ana Ntewa sinenan sape sisi nene imi ve p̃arin suṣe vena uarar pototo e limana vena ve suṣen yeririna na yomarava lala, ana pogos naṣa sur mal viowa nene pe tol re sisi nene poli wa, ana akuslua veraga, akuslua pa ma puna ne Ntewa m̃ae kiena pupia lele na totanoena. <sup>6</sup> Ana sira nene marau, pure pa tapolou e yomema, e yo tai naṣa Ntewa kila ruru pe lelana, ana pa tapolou e yo nene, apisuar ruru naga e legiena moki, legiena tol manu taaga ponotia lua lualima pa orai [1,260].

<sup>7</sup> Ana e pogos nene pupia mara tai kapur ma e peni. P̄ar navisi nene Maikel amio kiena navisi lala, akila mara amio pupia nopi naṣani, ana naga m̄ena ga amio kiena navisi lala akila mara m̄arera paṣisi pan la. <sup>8</sup> Akila m̄a mara sanene pano-o, tol naṣa nopi nene, kiena nam̄areraena ṣisi, ana amio kiena navisi lala amloru apito tano. Ana akila kare la paṣisi, amla nakoena pan la, aṣar plan lelela ma e peni petan la. <sup>9</sup> Ana pupia nopi naṣani, akovenlua nena ma e peni veraga pitomi e yomarava, naga amio kiena navisi lala.

Ana e poglis nene nepisu kilale ga pupia arman nopi nene na wa, naga ke ga naṣa kus maran lom̄ara nanua sumo narui, naga yar sur naṣa asape Yermare, pona Yermare Lego, naṣa nanagane naga ke na wa, naga ṣere yomarava nini wetelu kusp̄al ke mrapa silaga.

<sup>10</sup> Ana siraunia, nemloge pulgo tai pio p̄ar make yo ma e peni, sape  
 “Nagane na natamaliaena kiena ne Ntewa suṃalu,  
 puriukawaena kiena ne Ntewa tauluia,  
 nasuṣenena kiena ne Ntewa pimi m̄alivi,  
 nam̄areraena kiena ne kiena Navisaarena pimi  
 m̄alivi, mon metavan make suria.  
 Yar viowa nene naṣa suṃa pisa kare mratava  
 puna Yesu, akovenlua naga rui.  
 Legiena a lemalo suṃal ga sike e marana Ntewa  
 kilali naṣa visawal mlamulen viowa kiena  
 ne yeririna lala,

ana nagane narui, akovenlua naga rui.

<sup>11</sup> Nalelagaena la mokliu naña pe asitom re si kiela malena la poli,

pe amaraun re si marena poli,

ana la asm̃al m̃arera m̃a pano-o ataulu yar viowa nañani,

a ya naña la apuarar ke e limala vena akila mara amio,

naga kuruta kana Narin Sipsip ga, amio visena lala navisawalen kiela lelagaena e Yesu.

<sup>12</sup> Ataulu yar viowa nene rui, sane nagane ma e peni, amio la make naña asike ea, akilia akekara na akekara,

ana la naña asike e yomarava pona sive, amloge piowa a monar amarau,

komin Yermare pito tano sike likan la amio sine-mimiena naña pule manene laa, komin naga kilia sape kiena pogos plas ga teke na, lavis naga p̃isi narui, ana sirag manene laa.”

<sup>13</sup> Visena nene yar tai pisawal ma e peni, nemloge pae, p̃isi na nom̃al nopi nene pisu kilale naña akovenlua naga pito tano e yomarava, ana sinena mimi laa narui, naga pisaar m̃arera sape yoko monar tol sira naña p̃armare ga narina na yerm̃ene nene na wa. <sup>14</sup> Naga pa m̃areran si pa sira nañani, ana milan ga amligan kupen lua pa sira nañani, sa naña kupen pepaum̃a, vena ka va tapolou e yo tai e yomema naña akila ruru pa rui vena avisuar naga ea. Naga pa sanene narui pupia nopi nene tañatete si tol naga e yo nene, asape yoko naga sike e yo nene pogos ve piavi

towe m̃aga naṣa kas tai, siraunia kas ve lua, ṣisi komsus nen kas si tai.

<sup>15</sup> Ana nopi naṣani pisu sira ka pano, naga kilia ga sape taṣatete si va war po yo, naga sinen mimi laa narui, plamolue mliluan pupia womie tai vena werelua sira nene va talilunia. <sup>16</sup> Pupia wii nene mlau pano, lavis tol sira naṣani, ana amilan ga yomarava sinen miye sira naṣani, miila naga naṣa porotano purṣa veraga pikepaia sa naṣa pupia logona, sinomlaun ga wii naṣa nopi nene mliluania. <sup>17</sup> Nopi pisu narui, nagane kiena sinemimiena pimi piowa laa narui, ana mligan sira naṣa sike na, sape vanon ga narina taṣena lala, nane yeririna la naṣa asum̃a ataveve ke navisaluaena kiena ne Ntewa, sane la naṣa apuarar ke visena kiena ne Yesu m̃arera.

<sup>18</sup> Pisa pa sanene narui, pano amio kiena pupia sinemimiena, panon kila mara amio taṣena la nene.

## 13

*Surmal viowa ṣesa, naṣa molue e sive, nopi mla nam̃areraena pania*

<sup>1</sup> Pupia nopi mialoro pitove, sum̃al sike yepas nen sive. Ana pe piavi re poli, nom̃al ga surmal tai molue e sive paminia. Yar naṣani naga ṣarina olua, a kana lam̃aliu tol lualima, a e kana lam̃aliu la pepe taaga karo wa na ṣarila kiena ne ṣarin suṣe lala telan sike ea. A e piamenala la pepe taaga, asiri kia tai sike e la, naṣa na viuelena nawarnena kareen Ntewa. <sup>2</sup> Surmal nene, nom̃al pe taṣena ga, naga sane sape ve sa towe m̃a laion,

komin logona sanena laion, ana lana varoka sane lana surmal taþena naþa pea. Ana naga pimi suñalu sike e nopi naþani, a nopi mla puriukawa pania, kila naga pe þarin suþe e kiena lepasa, tañan nañareraena make ga pania.

<sup>3</sup> Ana nepisu veve ruru surmal naþani amio þarina lala, nomal þarin tai pupia piakapila na magka tai ñeke ea, keviu paþisi. Pogos naþa þar magka nene, naga pe na marena ga, ana yar na yomarava la amilan ga naþa akila ruru pimi ñao sina, ana kila narui apilon kiela sitomena lala apim amlelaga e yar mal nene, ataveve ke naga.

<sup>4</sup> Sanene, la akekaran manene laa surmali nene, ana pogos naþa apisu nopi mla nañareraena pania vena imi ñarera manene laa, akekaran paþisi, amlotun nopi, a amlotun yar mal nene naþa suña sumon la. Apisa sanini, asape “Ane kilia taulu kieta yar mal na kilaen mara nene pogos tai? Nagane pe yar re si tai naþa ñarera manene torokin naga poli.”

<sup>5</sup> Ana pogos naþa yar mali nene pimi ñarera ruru sanene, siar vena kila kiena napiowaena lala. Naga suña kila ke kiena visena na vilaveena lala, suña piuel kar ga, a suña miyuñae ke amio kiena nañareraena viowa, a kila ña pano tol kupario lualima yam vari pa lua [42], sane kas telu komsusa. <sup>6</sup> E pogos nene, naga suña þarnena kare Ntewa, piuelin ke kiena kia, a suña koven ke visena viowa pan peni amio yar wa la naþa asike ea. <sup>7</sup> Puriukawa naþa amla pania, torokin naga kila mara va va nalelagaena wa lala, vano-o kilia taulu la, a

nañareraena naþa naga þar ke na, torokin naþa naga ve suþen yolai make ga, yeririna make ga, visena make ga, amio purvanua make ga. <sup>8</sup> Naga kilia ve suþe mña sanene vano-o yar make ga na yomarava nini yoko avatanonia, ana laþasa yoko taþatete avatanonia, a naga nene la ga naþa siar e nasiiena yomarava pimi, kiela kia asiriar sike loyuña e tus na malena kiena ne narin sipsip naþa añañaria.

<sup>9</sup> Ko naþa visae ologe visena la nene, visae kiligaña toña ga, popon ologe kilale ruruia.

<sup>10</sup> Nalelagaena naþa vena akusvinaun ga e kiena purvanua vena va yuñae kiela, naga yoko monar va ga narui. A naga naþa na teluaen kolmekina e playu na kilaen mara, ee, yoko playu na kilaen mara monar te ga kolmekina narui. Visae pogos ñarera tai sanene, yoko li nalelagaena wa lala monar asuñal ñarera amio kiela sitomena viayavi lala, monar amasisu mña vano-o awar ro ea ava atol luasa.

*Sur mali viowa na lua, naþa molue e porotano*

<sup>11</sup> Ana siraunia nepisu ke sina ga sur mal viowa taþena tai, naga molue e porotano pam. Naga kana lañaliu na þarina lua ga, sa ga narin sipsip tai, ana pogos naþa pis, pulgona sa ga nopi naþa sumo.

<sup>12</sup> Ana surmal na sumo tañan na lua nena yuñae amio kiena nañareraena ñarera make ga, naga kila mña pano-o yomarava amio kiena yeririna make ga la amlotun surmali na sumo naþani, naþa þar pupia magka na marena ga yoko mña sina. <sup>13</sup> Ana na lua nene asuña akila ke pupia kile lala amio pupia sur na ilanen lala,

pano-o akila tai naña kap molue ke ma e peni pitom e yomarava e maran yar la naña apisu ke ne. <sup>14</sup> Ana e kile la nene naña naga kila ke ne e kia kiena ne sur mal na sumo, naga suña pisa kotalia ke yeririna na yomarava lala, ñere la apa ape wowe laa narui.

Naga pisawal pan la sape ate nono kiena ne surmal nene, naña playu sia ana mal si moña ga. <sup>15</sup> Ana amiyuñae pae, amla ñareraena pan surmali na lua vena kila nono nene kilia yuveve, akilia vis, a amla ñareraena pania vena kilia weñar yar ai naña pe kekaran re vatanon naña lotun nono nene poli.

<sup>16</sup> A amio ñena nanini, naga ñareran make la ga vena awe tatu se limala marua, visae peraga, e piamenala. Yaru kar ga lala amio yerkawa lala, a la naña limala korena ga amio la naña limala pule, a yar la naña amiyuñae, amio kiela nasumonena lala, la make ga awar tatu nene. <sup>17</sup> Visae tatu nene ve su re e la, tañatete aul sur tai e yuña na wilwiliena, a tañatete awilwilin sur tai va yar taña.

Tatu nene naña awe se e la, molue kome kia kiena ne surmali nene, naga marana na kiena kia.

<sup>18</sup> Ko naña oulo tus nini monar omanmarua ruru e yo nene. Visae ovisu kilale make suria, yoko okilia olual marana na kia kiena ne yaru lala, ana apuloviraviran marana na kia na surmali nene, añal tol lualima yam orai pa orai, pona sa naña laña asape, orai orai orai [666].

# 14

*Narin Sipsip amio la naña atol manu yam ponotia taaga lualima yam vari pa vari [144,000]*

<sup>1</sup> Nekira ke sina pa yam tai, noñal tavie nae Saeon mēke ga vamon inu, a ma e luasa noñal Narin Sipsip suñal sike ea, naga amio kiena pupia ñina na yeririna tai. La asiri kiena kia amio kia kiena ne arimana Ntewa sike e piamenala, a la moki pañisi, kana marana tol manu yam ponotia taaga lualima yam vari pa vari [144,000].

<sup>2</sup> Ana pupia mñaagena tai kom ma e peni pitomi, taulu naña sive ñanpo e piame pona polilu tera. Ana nemiagogonia, nemloge ga naña añe kita la amiyelu, <sup>3</sup> a la asuñal asike vamon yo wa, e marana ne yar mal la vari nene amio nasumonena lala, amiyaun ke yauena viu tai. La tañena la mokliu naña akekaran yauena nene pañisi, la sinelan mēna asape ayaunia, ana akilayon ñelea. La ga naña akilia ayaunia, nane ñina na manu yam ponotia taaga lualima yam vari pa vari nene, naña apul plan la petan yomarava rui. <sup>4</sup> La ke naña pe akilali re piowa amio sira yam tai poli. La apuarar ruru kiela malena mekik ruru po silaga, a ataveve ke Narin Sipsip nene va e yo nape naña naga va ea. Yeririna la mokliu naña asike ne, ana la ke naña apul plan la petan tañena la narui, a la akilala apim sane mras ñesa nalaena va Ntewa amio Narin Sipsip.



<sup>5</sup> La nene pe visokanen re tai molue kome logola poli, pe sur viowa re nena tai sike e kiela malena poli.

*Navisi la telu*

<sup>6</sup> Ana e poglis nene, nomāl navisi tai momā kaka ke e yo punu ga ma metava. Amla lologena wo naña ve uro re pania, vena naga kilia va lologon va e yo punu ga va yeririna na yomarava lala, vena va tol purvanua make ga, yolai make ga, a visena make ga. <sup>7</sup> Naga pisawal ke pa e yo punu ga amio pulgona naña keviu, sape

“Amiu avatanon Ntewa,  
avisirlua kiena kia,

komin naña kiena aora na liņereen yomarava  
mālivi rui.

Alotun naga naña sii sinapane, yomarava, a sive  
amio purņes nen wii lala.”

<sup>8</sup> Ana siraun na nene, navisi nalua taveve pimi  
naña naga piovion ke sape

“Pupia pulkumali viowa naña Ppilon naga mlor  
rui!

Naga pa mla ntewa naña pe pe lelaga re poli, a  
ņere plan yeririna mokliu naña apa ape  
wowe amio, la sa ga yar na ve torogen ga  
lala.

Nanagane, pupia pulkumali nene pimi piowa rui  
amio kiena nono lala.”

<sup>9</sup> A yam si tai, navisi na telu taveve la pimi,  
pisawal manenea sape “Yoko yar la ve moki naña  
akinai vena alotun yar mali viowa amio kiena  
nono, a yoko yar la ve moki naña ataņan awe  
kiena tatu se piamenala pona limala.

10 Ana yar naþa kila sanene, yoko naga mñena ga mun e piala naþa pulen kuruta namunena naþa melkalka na pupia sine-mimiena kiena ne Ntewa. Yar na sanene, mapulukapi luamene lege kare tasnena e marana navisi wa lala a e marana Narin Sipsip.

11 Ponoyomñe na kiela naloge viowaena yoko molue lue e kapi naþa taþatete mare pog tai. La naþa amlotun ke Sur mal Viowa, apatanon kiena nono, amio la naþa aþar ke tatu na kiena kia e tasnela, la taþatete atol yo wo na va ruru laena, ana yoko ayumñen ga loge viowaena ko legiena a kolemalu nalue ga narui.”

12 Nakoarena nini naþa navisi pisa mñarera paþisi, ana kana kinasa sape ita li nalelagaena wa lala monar tesumñalu mñarera temio kieta sitomena viayavi. Monar telogear navisaluaena lala kiena ne Ntewa, a silaga monar teve lelaga e Yesu.

13 Ana nemloge visena tai molue ma e peni, sape “Nanene visena tai naþa yoko osirilua, naþa sape, siar nagane vano, la naþa yoko amare, naþa kiela malena su ruru sike e limana Suþe rui, yoko awar pupia navisa ruruena.”

Visena nene þisi, ana nemloge Ninuna tamñania, sape “Ee, la nene yoko kiela yumñena wo la avam metava amio la, a nagane yoko taþatete si ayumñae narui, la atol kiela navaruruena wo rui.”

*Navisi la telu apito aþar kinanena naþa marua e yomarava nini*

14 Nekira si pano, ana lul yuwowo tai m̃eke ga vamon inu, ana nom̃al yar tai, sane Narin Yeririna, totano teke e lul nene rui. Totano teke amio karo na p̃arila kiena ne p̃arin supe lala e p̃arina, naṗa amiyum̃aen e kol, a e limana tarar ke uknaep tai naṗa mal paṗisi vena teen kras nen kinanena lala. 15 Ana navisi taṗena molue e yuṃa wa, pio ke naṗa teke tano e wos nen lul nene, sape “Poga, osuṃalu, otar kiom̃a playu ova osiar yuṃaena. Kinanena la naṗa sike e yomarava amarmarua rui, nagane pogos na teen narui.” 16 Ana naṗa teke tano e lul suṃalu, silin kiena playu pa e yo kar ga e yomarava, te kinanena la naṗa marua sike ea.

17 Ana navisi taṗena molue e yuṃa wa ma e peni, naṗa naga m̃ena p̃arar ke kiena playu naṗa pe uk, naga m̃ena mal na mal. 18 Ana navisi ke sina tai pitomi, naga naṗa pe navisuaren pulukapi, ana naga p̃aro e wonta pimi pio taṗena naṗa mlarar ke playu, sape “Pogaga, ko m̃ena ga, pogos naṗa oto okila kiom̃a narui. Otar kiom̃a playu oto owar punu kilis nen kerep la nene teliv e yomarava nini viora, ote polo mras la naṗa marua telan sike e kilisa.”

19 Ana navisi naṗa mloge, teran kiena playu e yomarava, pito p̃arpolo mras nen kilkerep e yomarava, koven la e lele na winplanen was nela naṗa asike vanua e pulkumali. 20 Ana nasinemimiena kiena ne Ntewa kilapel la ga, pumumu kare la pano-o kuruta mlau p̃arpoyo, mlau pimi keviu sa ga womie, kokonia make

purvanua wetelu merorol pa tol kolmekin yaru,  
pano pano kilamarala plasania.

## 15

### *Navisi olua amio pog viowa maro olua*

<sup>1</sup> Nepisuveve ke sur la ma e peni wa, ana pe yam piavi re poli wa nepisu pupia kile taþena naþa pe pupia sur na ilanena paþisi, nane navisi la olua, naþa la aþar maron pog viowa la olua. La maro sanene komin naþa visae la awar ro pae, nane kila sane pupia nasinemimiena kiena ne Ntewa yoko þisi ruru nenaga. <sup>2</sup> Ana noñal pupia yotop tai, meri ga pano ñeke na sa ga sive, ana naga kap ñeke ea, ana pila na pila. Ana e lepas nen yo nene, nepisu yar la mokliu asuñal asike ea, a la nene, naga yeririna make la naþa ataulu yar tetan, la ataulu kiena nañareraena, a la ataulu puriukawa na marana na tatu naþa añe sike ea, naþa yar nene þaria sane kiena kia nowo tai.

La naþa atauluia, asuñalu asike amio kiela kita lala naþa Ntewa þar pan la, <sup>3</sup> ana asuñã añe ke kita la naþani, la asuñã amiyaun ke kiela yauena tai naþa yauena kiena ne yar na yuñãena kiena ne Ntewa naþa Navisawalena Mosis, ana nagane pimi naþa apio asape yauena kiena ne Narin Sipsip. Yauena nene pa sanini, sape

“Akee Ata Ntewa na Mareraena  
kiomã yuñãena la akerkeviu paþisi, apowo  
paþisi, ko ope Þarin Suþe kiena pog make  
ga, kiomã þelaga la mesmesu a ape lelaga.

<sup>4</sup> Ko ope Suḡe, pe yar re nena tai naḡa ve maraun ko re.

Pe yar re nena tai poli naḡa ve vatanon re kiomḡa kia.

Ko ga ope na wa kemua lelaga,

ana yolai make ga monar akinai tano alotun ko, komin nagane, sur mesmes la naḡa ko okila, lala aḡaliv apim amerarava ruru e kilamaran yeririna na yomarava la rui.”

<sup>5</sup> Pisi na nekira ke sina ga pa loyumuḡa ma e peni ana nomḡal pulutava na yumuḡa wa lala suwowo ga sike na. Nepisu sane silparpara na tapolen nena nanua sumo akutarar kome yomema pimi, naḡa amligan ruru navisaluaena kiena ne Ntewa sike ea. <sup>6</sup> Apike pae, ana navisi la olua amolue ea. La amiyen kulmrae urmi la naḡa amekik ruru po, apilavila, a atelan kulka naḡa amiyumuḡaen e kol ḡaro e yerela. Ana amial apim, amio pog viowa olua naḡa aḡar ke ne.

<sup>7</sup> La apim asumuḡal asu narui yar mal la vari tai nene kian piala naḡa pe kol olua pan la, tai kus tai, tai kus tai, naḡa apulen ga nasinekar kiena ne kieta Ntewa naḡa sulue na sike ne.

<sup>8</sup> La akuspae, ana komin pupia naurarena na namareraena kiena ne Ntewa sike e yumuḡa wa nene, kapiu ḡar punu yo paḡisi, kila yar taḡatete va loyumuḡa. Ana sumḡa sanene pano-o tol naḡa pogos viowa olua kiena ne navisi la olua nene ḡisi ruru nenaga.

# 16

*Pias nen nasinekar kiena ne Ntewa olua naña puleule nenaga*

<sup>1</sup> Ana nemloge visena mñarera tai molue ma e peni pa pa navisi la olua nene, sape “Nagane, pogos na yuñae kiamiuena narui. Ataron plan pias nen nasinekar kiena ne kiamiu Ntewa veve taaga vito e yomarava.”

<sup>2</sup> Pisa pae, ana navisi na sumo pa taron plan kiena piasia pito e porotano, ana kana wii nena mlau pa kila magka wa la molmolue kalo tas nen yeririna la naña aña tatu na sur mal viowa sike e yepela, naña la amlotun ke kiena nono, añar kare magka pano-o pisa amloge sinelalaea pano-o pañisi.

<sup>3</sup> Yoko navisi na lua towe taron plan kiena piasia pito e sive, ana kana wii mlau pito tol sive kila pimi pe kuruta sane na yar mare, a sur mal la naña sike ea amarmare make nenaga.

<sup>4</sup> Yoko navisi na telu taron kiena piasia pito e wii lala naña amlau, ãarar purp̃es nen wii lala, ana kana wii mlau pitove kila la mña apim ape kuruta veraga. <sup>5</sup> Ana nemloge visen tai pitomi e navisi nene naña pe ãarun ke wii na yomarava lala, naga sape

“Ko na osike mña na konua rui, a osike nagane, ope Nawa,

kioña nakoarena la nene amñarera manene laa, ana kioña naliãereena mesmas ga.

<sup>6</sup> Lelaga naña yar na yomarava lala, amñemoñar kioña yar wa lala, akila kuruta na kioña navisawalen la mlau, ana omla maran

ke sina pan la pogaga, naþa mñala wii namunena ape kuruta make ga.”

<sup>7</sup> A visen taþena si molue mñena e wonta, sape “Ntewa na meta manenea, pe lelaga paþisi, kioñã naliþereena lala amesmes ruru nenaga, ape lelaga paþisi.”

<sup>8</sup> Yoko navisi na vari taron plan kiena piasa pito e mrae, ana kana wii kila mrae yo pisun manene laa, kilia lege yeririna na yomarava la sane kapi. <sup>9</sup> Ana amloge yepisusun, yepisun kekan la pano-o apiuelin kare kia kiena ne Ntewa paþisi. Akilia ke asape naga mligan ke nakoaena la nene pimi, akilia mña asape naga visae sinenania kilia visaluþaria, ana yepela mavin ga vilon laena, asape taþatete avatanon naga, a taþatete aieluar naga pog tai.

<sup>10</sup> Yoko navisi na lima taron plan kiena piasia pito e pupia lele na totanoena kiena ne sur mal viowa naþani, ana kana wii mlau pito kila lepas wetelu na kiena nasuþenena, yo malolo make nenaga. Yar la amloge piowagan nakoaena nene þisa, akarar purmenela la pano-o, <sup>11</sup> apiuelin kare Ntewa nae peni komin kiela yepelalaea a kiela magka wa lala, ana apisalupar ga, asape taþatete nenaga avilopu la e kiela naviowaena.

<sup>12</sup> Yoko, navisi na orai taron plan kiena piasa pito e pupia wii naþa mlau, kiena kia Yupretes, ana kana wii nena mlau pito þartaþe wii naþa mlau ke ne pimi mema nena ga. Nanene kila narui þarin suþe na purvanua make lala na lepas naþa mrae þarpo yo ke ea, pe kiela mrapa narui,

vena waroen yo ea aimi amio kiela yar na mara lala.

<sup>13</sup> Ana noñal ninuna viowa telu naña sane prok, naña tai molue e logona pupia arman nopi, tai molue kome logona Surmal Viowa, a tai molue kome logona navisawalena na visokanena. <sup>14</sup> La telu nene, ninuna ne yermare la telu naña asuñia akila ke kile lala, a asuñia aņaro make puna p̄arin suņe na purvanua lala na yomarava, aņerela apim lele taaga vena akila ruru make suria komin pupia mara naña yoko kapur e pupia legiena maro naña Ntewa na mava pisaar rui. Ntewa pisayu legiena nene rui e kiena visena tai, naña sape

<sup>15</sup> “Avisuar amiu, yoko noñalivin amiu vinauga, yoko ailan inu sa naña visae yar na vinauena tai imi.

Yar naña kon ruru kiena sur lala, naga su ruru ke narui, a tavilo ke ga wa, vena sumiate inu, vena imimi lua mevano, yoko wo van vaņisi.

Ana yoko laņasa ailan sane yepela ve sinas ga akiriri tetai, amawa vaņisi e pogos nene.”

<sup>16</sup> Ana noñal pog na mara na legiena maro pimi p̄arpoyo, a ninuna la nene aure p̄arin suņe na yomarava la ava lele taaga, nane e yo naña visena na Epru sikia sape Amaketen.

<sup>17</sup> Yoko navisi na olua taron plan kiena piasa, ana taron plan ga pitomi metava e yepesinas na mēke ne. Ana visen tai molue kome yo wa



na totanoena loyuña e yuña wa nae ma peni e pogos nene, pion manenea sape

“Nagane pogos na luas nen sur make ga.”

<sup>18</sup> Ana yekarpla siar e yo punu ga veraga, ãarar kana polilu ne la naña atera, a navioena lala a ñaagena lala. A ãarar ñena, pupia yemninu, yemninu ña pano-o pa piowa manene laa sa naña pe yar tai pisuli re yam tai poli wa, siar e naña yar mal e yomarava pimi tol nagane. <sup>19</sup> Ana yemninu nene kilaña porotano, kila pulkumali lala na purvanua make ga teliv e yomarava nini piora amloloru, a kila pupia pulkumali naña Papiilon purña lepas telu.

Ntewa suña sitoñal ke yo nene, ãarar kiena napiowaena lala, ana kila karepel manene pañisi torokin nena kiena ãelaga naña kilakila ke ne, kila naga mun e piala naña pulemamagan kuruta na munena na ñareraena na kiena nasinekar. <sup>20</sup> A ãarar yemninu nene, narin purvanua la apureure apano akokovio, a tavie la nanua asñal asu ne, añal la re si poli. <sup>21</sup> Aes yua la meta e sinapane amloloru sane pupia kilavaru lala, a monar yeririna la naña asike e yomarava. Amloge manene laa piowagania, apisu naña sur viowa nene ñarera manene laa, pano-o asuña apisalele kare Ntewa.

## 17

### *Sira viowa teke tano e surmal viowa*

<sup>1-2</sup> Ana e pogos nene navisi tai pimi, naga na navisi la olua tai naña akus ke piawi pias

---

**16:18** Nakilol 8:5, 11:13,19  
Nakilol 11:19

**16:20** Nakilol 6:14

**16:21**

olua nene. Naga pimi mesmesun in ga, pisawal sape “Otaveve inu. Yoko nekipian ko e pupia pulkumali viowa naña Pápiilon, naña mēke e naña pupia wii la mlau ke ea. Pulkumali nene miyuñae piowa ga, sa ga sira na mrapa tai. Naga sa ga p̄arin supe na purvanua tañena apa akila ke kolau pania, a sa naña m̄ana kuruta na munen kila sitomena kien yeririna na yomarava la apa apiowa laa narui. Ana oimi, yoko nekila ko ovisu ya naña yoko imi m̄alivinia e pogos naña yoko naga war ruru kiena nakoena napo.”

<sup>3</sup> Ana navisi nañani pimi p̄erelua ninuu, mli-gan inu nesike e yomema tai. Ana nepisu sira tai totano teke meta e purwolu na puluk tai. Sur mal nene pivaga make ga, naga p̄arina olua, a kana lam̄aliu lala tol lualima, a e yepen make ga asiri kia viowa lala navisalelekareen Ntewa. <sup>4</sup> A sira nañani, naga miyowau pañisi e kulsota la naña amemaena a apivaga, a apaia kare yepena lala e mrakotal lala, a e pialaliga lala, a e sur la naña pe kol, a e kilavaru la naña merarava po naña kana kilavaru ne pa metava pañisi, amio sur la naña asike loyuñā e mratamelilivi. Naga mlarar ke piala tai naña pe kol, a piala nene pulen ga kiena p̄elaga viowa lala amio kiena kolau. <sup>5</sup> Asiri visena tai sike e piamenana, pe visen wan ga tai, visena nañani naga sane kia tai, naña pisa sanini, sape

“Pápiilon naña keviu,  
anenane sira na mrapa lala,  
purp̄es nen p̄elaga la naña ape kororaki e yomar-  
ava.”

<sup>6</sup> Nepisu manene mña sira nene sanene, nepisu kilale sane mun wii ana maran telivi, a pe komin re naña mun kuruta na munena poli, ana komin naga mun ke kuruta kana li na lelagaena wa lala, nane la naña amemoñar la komin naña ataveve Yesu. Nepisu sira naña sanene narui, yepeu pñili na pñili!

<sup>7</sup> Ana navisi pisa pan inu, sape “E, ya ne kila omila manene sanene? Osuwa, yoko nevisa meraravan van ko na wa. Sira nene, pñarar purwolu puluk naña teke e wos nena, a pñarar pñarina olua a kana lamñaliu lualima, suri la nene kala kinasia sumña ga, a yoko nekila ovisu kilale ne.

<sup>8</sup> “Purwolu puluk naña opisu ne, naga mñeke kemua nakonua rui, ana naga pe su re si nagane poli. Ana e pog tai naña pimi ke ga wa, yoko molue si vetan pulus naña mñeke e nagane, yoko vanon marñanun kiena nakoarena. Ana e pogos nene, yoko yeririna na yomarava la naña asike ga wa, yoko avisu purwolu nañane. Nane la naña siar e nasiiena yomarava pimi, kiela kia pe su re e Tus na Malena poli. Pog naña avisuia, ailan vañisi, komin akilia asape naga sike kemua na konua rui, yoko pe su manene re si yam piavi poli, ana siraunia, naga molue sina. <sup>9</sup> A yar naña pe manmarua ruru po, yoko naga kilia visu kilale ruru kinas nen sur la naña yoko nevisa.

“Nasumo, pñarina la olua. Kana kinasia, pisa pulkumali tai naña sira nene pe suñenia, kunus olua sike ea. A kunus la nene, la mñena kala kinas sumña ga, naña sape pupia pñarin suñe la olua

asumña ga. <sup>10</sup> Tol nagane, þarin suþe la lima nene aþis rui, a tai sumal sike nanagane. Tai mēna ga pe mālivi re poli wa, sike ga wa, a pog naþa imi, yoko su towe laa ve piavi na wa.

<sup>11</sup> “Ana purwolu puluk mēna, naþa suþes nanua a nagane pe mon re si poli, nanua sumo naga mēna þarin suþe la olua nene tai. Naga la ke tai narui, ana yoko wasuþe sina sane þarin suþe na orely tai. Naga pe yerka wa sanene, ana pe sur koren ga, komin yoko naga mēna þisi, va war kiena nakoarena mārera.

<sup>12</sup> “Sur taþena na vike meraravanena, nane la mālivi la lualima naþani. Nanene kala kinasia nane þarin suþe si lualima. La nene pe asumal re poli wa vena ave suþen kiela lepa lala, ana yoko akila ga kiela yu mēna la na wa e pogos na purwolu nene sumalu. Yoko ave suþen pae yomarava nini amio, ana nane naga pe na yam plas ga, sa ga aora taaga.

<sup>13</sup> “La lualima naþani, la taþatete akila kiela yu mēna lala, ana la ape nakilaen ga yu mēna kiena purwolu puluk nene, vena kiela namāreraena iila naga, vena kila naga imi ve keviu la sane. <sup>14</sup> Yoko la punu nene aim veraga vena akilali mara amio Narin Sipsip, ana taþatete atauluia. Peraga, ana yoko naga taulu la, komin naga ke narui naga pe suþe kien suþe lala, naga pe þarin suþe kien þarin suþe lala, a kiena yeririna nowo lala, nane la naþa naga pio la, naga mligan plan la, a la nane ave lelaga e naga.

<sup>15</sup> “Sur navisa meraravanena taþena, naga wii lala amio sive lala naþa opisu sira viowa nene

naña towar la ke ne. Kala kinasa, naga yeririna la naña asike e yomarava, amio yolai lala, a purvanua lala, a visena lala.

<sup>16</sup> “Ana siraunia, purwolu puluk nene amio kana lamãliu lualima, yoko yepel mavin sira viowa nañani. Yoko asuñalu akila imi viowa van vañisi, naña ayen plan mñana kulsota lala ve plamoñe e maran yar lala, a yoko akan make kana kilamñiu lala ana okoven kana puriu lala vito kapi kekania.

<sup>17</sup> “E mrapa ne nanene naña yoko akila va sira nene, tepisu sane torokin nena nakoena naña Ntewa pisawal e kiena visen tai nanua sumo rui, sinenan sape sira nene monar waria. Naga ga mligan e kiela sitomena lala amio purwolu puluk nene, vena akila sanene vania.”

<sup>18</sup> Ana navisi nañani kila make kiena visena e poglis nene, sape “Nane navisa meraravanen sira nene narui, naña naga pupia pulkumali naña pe suñen ãarin suñe tañena lala e yomarava.”

## 18

### *Pulkumali viowa naña Páylon mloru*

<sup>1</sup> Yoko, nepisu navisi tañena molue ma e peni pitomi tano. Naga pe navisi mñarera tai kiena ne Ntewa, pitomi ãarar pupia namñareraena, a kana nategoliena kila yomarava pilavila. <sup>2</sup> Naga pio e pupia pulgo tai naña pisawal sape “Pupia pulkumali viowa naña Páylon, mloru rui.

Nagane, yo nene pimi pe umã tai mãana yermare lala a pe yo tai naþa ninuna viowa la atapolou ea.

Manu make ga naþa akila ke þelaga na kororak viowa lala, la mēna amē mēala ponovi sike ea.

<sup>3</sup> Naga pa þere ntewa la naþa pe ape lelaga re poli, a þere yeririna taþena la apa ape wowe amio, la sa ga yar la naþa amun wii þarila telivi. Sa ga naþa naga pa þere þarin suþe na purvanua taþena lala, apa akila kolau amio, a yar la naþa amiyumãen ke kilavaru e yomarava telivi piora, la ataulu kilavaru namname paþisi e yumãena viowa lala na pulkumali nene, pano pano-o apim ape yar na sur moki manene laa.”

<sup>4</sup> Navisi pisayu sanene þisi, ana nemloge visen taþena kom ma e peni pitomi, pisa sanini, sape “Kiau yeririna lala, o! Popon aurmatan yo nini vilaga,

visae peraga, naga warar amiu ava e kiena mlamulena viowa lala,

visae peraga, naga warar amiu mēna ava e kiena nakoarena lala.

<sup>5</sup> Kiena mlamulena viowa lala ponpolo mēga pa tol ma e peni, a Ntewa taþatete sinen þesan naþa naga kilaroro kiena navisalu-aena yam via.

<sup>6</sup> Popon ga naþa alamaran si naloge viowaena vania sa naþa naga kila pa yar taþena lala, popon aul maran vania va yam ve lua e ya naþa naga kila rui.

Wii melkalka naña naga kila yar taña la amunia, popon akokonia ruru mña piala ulemamaga.

<sup>7</sup> Nanua, kiena nalogewoena e kiena malena meme ga, naga keviu pañisi, ana yoko vilon imi ve naloge viowaena e yepe lalaea lala amio tagiena lala.

Ana nanene na pere ke na wa, komin naga pilaven ke kiena sitomena na wa, suna pisa ke pania, sape 'Ke, in na nepe ãarin suñe sira sanene, neto ruru na neteke ne. Sur make ga po manene laa pan inu, ana tañatete nena neve sa letano tai naña pe kiena sur re poli, tañatete nena netagin naloge viowaena pogos tai.'

<sup>8</sup> Ana naga, e legiena ta ne pimi ke ne, yoko sur viowa la kila kare ruru naga veraga. Yoko marena, warar tagiena, amio viso, a yoko kapi kekalele kare naga.

Naga pe sitom re sur poli, ana Suñe Ntewa naña yoko liñere naga, kiena namareraena naga keviu manene laa."

<sup>9</sup> Ana navisi pisa sanini, sape "Parin suñe make ga na yomarava nini telivi piora, la naña apa amlotun ke ntewa lala na pupia kumali nene, yoko avisu kilale naña naga mlor rui. La ke narui naña sane apa akila ke kolau amio, apa amloge po amio naga e kiena malena wo pano-o, pe asitom re nena sur tai.

"Ana pogos naña mloru, kana kap la naña kekan ke ne piuyu pa metava, nanene narui yoko sinela viowagan vañisi, yoko ataginia. <sup>10</sup> Yoko avisu nakoena la naña naga suna ãaria, yoko

kila la m̃ena asiar ayuyuwawa. Yokoy asu la gar perina akira avisusuia, avisave

'Ake, pupia P̃apilon, pulkumali nam̃areraena, sinemimi miye ko pañisi.

Lelaga nañane, osu ruru m̃a pano-o, ana e aora taaga ga nene om̃al kiom̃a luasa, omloru, oñisi nenaga.' "

<sup>11</sup> A ãarar m̃ena, yar na stoa lala e yomarava wetelu yokoy atagi a sinela yea, komin naña pe yar na ulen re si kiela sur la poli. <sup>12</sup> Nanua sumo, akila kiela waa lala pulen ga tegaki nowo lala, sane sur la naña amiyum̃aen e kol ãarar selpa, amio kilavaru na kupito naña pupia kilavaru, amio sur naña sike e mrakiav, a kulmrae la naña kala marala la powo, a lak la naña ponotaninu, a sur la naña amiyum̃aen e maluen elepen, pona e lak lala, pona e pototo lala, pona e kilavaru lala, ana nagane, kiela yum̃aena na tauluen kilavaru la nene apim amlolor make ga. <sup>13</sup> A e legien nene, yokoy yar la ve aul re si sur na kilaen kinanen lala, sa naña m̃aki lala, ãarar mrasil lala, pona yago lala, puluyavi na kilaen kilaparavi amio kona lala, ãarar m̃ena sur na munen lala sane kuruta na munena. Yokoy yar ve ul re si sur la ne sane ponotaninu a sirveve na mras nen olip, a sur na tauluen kilavaru la ea sa nanua sumo, sane puluk, sipsip, wosi ãarar kana sur naña ãerewerea. Lañasa nanua sumo apuliwilin yar lala apim amiyum̃ae korena ga pañ yerkawa la sane, yokoy ve akila re si narui, komin pogos naña pupia pulkumali nene mloru, yokoy yum̃aena



toko narui, ana yar tařatete si taulu kilavaru na visuaren kiena malena.

<sup>14</sup> E pogos nene narui, yoko avisayu yo nene, avisave

“Ko sinomřan osape owar mrasnomřa la nařa ve kerkeviu ve moki, ana naga pe marua re poli wa, kekapil make rui.

Nanua, ko na lumomřa pule ruru nenaga, kionřa sur la punu ga po tanea pařisi wa, ana nagane kokovio make nenaga, tařatete nena yar tai visu si sur wo tai e ko narui.”

<sup>15</sup> A yar na wilwilenen sur la nene, nařa la ataulu kilavaru la mok li e rui, yoko asumřal ga asike perina akira vano, ailania a amaraun nakoena nařa pupia pulkumali nene sumřa řaria. Yoko sinela ye vano-o vařisi, <sup>16</sup> yoko atagin vařisi, avisave

“Ake, pupia kiamimi pulkumali, mesitom ko pařisi wa.

Nanua sumo ko na omyowau ruru po pařisi wa, ořar kotal a na kolmekimřa la nařa pe kol pialaliga la řar punu yepeřa lala, ana nagane na ko na peraga narui, kap mare.

<sup>17</sup> Sanapen na kionřa pupia sur mok la nene kovio ga e narin aora taaga ga sanene?”

A yar lala na uararen řeligas nen waa la nařa nanua ařarwar ke tegaki lala, řarar kiela yar na yumřaena lala, amio la nařa akomkom ke e waa, pona ataulu kilavaru e sive, la mřena asumřal ga asike perina apisu manene ke yo nařani.

<sup>18</sup> Pogos nařa kana kap ne la piu, pa ke ma e sinapane, yoko avisasa yo nene avisave

“Lelaga o, pulkumali nene na yo ta nene nařane,

e yomerava nini yo tai pe sa re si nene poli.”

<sup>19</sup> La asitom sanene, a amloge piowa, akoven kare posnoyavi e p̄arila p̄isa, atagi, asape “Ake, kiamimi pupia pulkumali, piowa pan ko pañisi wa.

Ko na opulen ga kilavaru, ana memiyum̄ae e kiamimi waa lala, moṣar kiom̄a tegaki lala, pano pano-o imimi m̄ena ga moñal kilavaru naṣa miila imimi, ana nagane piowa narui.

E pogos plas ga nene, ana opim ope yo na kovioena ga.”

<sup>20</sup> Ana pogos naṣa pupia yo viowa nene mloru sanene, visena tai molue kom ma e peni, sape “Ma e peni, pupia kekarena a logewoena.

Amiu nalelagaena wa lala, a nalologena lala a navisawalena kiena ne Ntewa, amiu akilia aieluar naga vañisi, komin naga mliṣere sira viowa nene rui, kila maran si pania komin napiowaena la naṣa kila pan amiu nanua.”

<sup>21</sup> Ana e pogos nene, navisi tai pimi kawelua pupia kilavaru tai, kusyaun pa metavan p̄arina koven pito kopo sive, talilu pito kovio. Siraunia navisi naṣani pisa sanini, sape “Pupia pulkumali viowa naṣa P̄apilon nanene narui, yoko akoven lua va ve sanene, akila naga loru vena taṣatete si kilia sum̄alu pog tai.

<sup>22</sup> A ko P̄apilon, visena na van ko sanini, sape yauena veraga amio yuka lala, yoko taṣatete yar tai loge si e ko,

yar na kilaen yuñnaena lala, yoko tařatete si tai  
se ko pogos tai,

a yoko ve m̃aagena na vilien re si kinanena lala.

<sup>23</sup> Yomerarava na kapi vivaga lala tařatete si  
tegoli kioñna yo lala,

a yoko tařatete si ologe visena na kekarena kiena  
m̃ee amio sira m̃ee nařa atalopa mare ga  
na wa.

Yar na kilaen kioñna kilavaru lala, e yomarava  
nini pe tai torokin la re poli,

a nañareraena kiena ne kioñna kimi lala a  
kioñna navisokanena ga lala kila ořere  
sitomena kiena purvanua tařena lala apa  
ape wowe.”

<sup>24</sup> Nane tepisu nařa Pařilon nene, naga pe yo  
tai nařa pe purřes nen napiowaena manenea.  
Navisawalena ai pona nalelagaena wa pona yar  
tařena nařa añeñar la komin nařa ape kiena  
ne Ntewa, ana kala kuruta la mlau e porotano na  
pulkumali nena, naga ke nene narui, nařa kila  
naliřereena a nakoena kiena ne Ntewa mloru  
ea m̃arera manene pařisi.

## 19

*Pupia kekarena ma metava komin nařa ma e  
peni taulu make suria*

<sup>1</sup> Siraun naga nene, nemloge pupia řina ma e  
peni apion manenea, asape

“Potena pan kieta Ntewa!

Tamaliaena, urarena a m̃areraena naga taaga ga  
kiena.

<sup>2</sup> Kiena naliřereena make ga ape lelaga a  
amesmesu pařisi.

Sira na mrapa la nene anela naga piowa ga,  
kiela na kolauena la akila yomarava pimi pe  
kororaki pañisi, ana Ntewa mliṣere naga  
rui.

Ana naga mla pupia nakoena tai pania komin  
kuruta kana kiena yar na yum̃aena la  
naña mlau.”

<sup>3</sup> Asum̃a amlolokai m̃a sanene, ana asikol ke  
sina ga, asape

“Potena pa Ntewa! Kapi kekan ke kororaki la  
nene rui, yoko kana kapi nena viu lue ga  
va metava narui.”

<sup>4</sup> Ana nasumonena la lualima yam lua pa vari  
[24] amio sur mali la vari akinai e marana ne  
Ntewa naña totano teke meta e kiena yo wa, ana  
amlotun ke naga. Apionia, asape

“Po pañisi! Potena pan keviu!”

<sup>5</sup> A visen tai molue m̃ena e yo wa nañani, pisa  
sanini sape

“Kam na yar na kilaen yum̃aena kiena ne Ntewa,  
amiu yerkawa lala a yeririna kar ga lala,  
kam make ga naña amlogear naga,  
nagane kana pog nena napo naieluarena.”

<sup>6</sup> Ana nemloge sina pupia ãina naña pio naña  
kiela m̃aagena sa naña sive ãanpoia mumu, sane  
polilu. La asape

“Potena pania!

Kieta Suṣe Ntewa na Mava, naga taulu make sur  
rui!

<sup>7</sup> Teieluar naga,

tevisirlua kiena kia, tekekarania.

Nagane pog wo na kilaen ãaṣagena na talopaena  
kiena narin sipsip narui.

Wona na sira paia ruru naga su ruru ga sike na,  
<sup>8</sup> a amiyowauia ruru naga e kulmrae viu wo lala,  
 apowo a amerarava pañisi.”

Ana kulmrae nowo naña miyuwowo ne naña wona narin sipsip na sira miyenia, naga kana kinas toña ga, kana kinasane sane yuñena wo la naña nalelagaena wa lala kiena ne Ntewa la akila rui.

<sup>9</sup> Ana navisi naña sike amio inu e pogos nene pis pan inu, sape

“Yoko nevisa kioña visena tai vena osirilua e kioña tus nene. Visena sanini, sane yar naña yoko avio naga vena naga mña va e kinanena na pañagena na talopaena kiena Narin Sipsip, yoko naga loge wo na wo vañisi.”

A sikol sina visena nene, sape

“Naga visena lelaga tai kiena ne Ntewa naña pe lelaga pañisi.”

<sup>10</sup> Ana nemloge naga pisa sanene pan inu, nekinai pania, nesape nelotunia, ana naga pialuñaria. Pisape “Toko, ve okila re sanene van inu! Monar olotun ga Ntewa naga taaga. In na nepe kiena yar na yuñena ga, sane ko, a sa mña wolai tañena la naña apiawa mñarera ke e visena lelaga lala kiena ne Yesu. A po pañisi naña amiu asuñña akila ke sanene, komin naña purpes nen kinas nen navisawalena lelaga make ga naña apisawal nanua pimi, naga Yesu ga ne, amio kiena visena lelaga la naña apuarar ke mñarera.”

*Yar mñarera naña kus wosi na miyuwowo*

<sup>11</sup> Ana e pogos nene, ma e peni pietava pan inu, nekira pa loyuma, nepisu wosi yuwowo tai naŋa po paŋisi suŋalar ga sike na, a yar m̄arera tai naŋa kusa totano teke ea. Naga ke narui naŋa kila mara suwo napiowaena, pona pogos naŋa kila kiena naliŋereena, ana naga miyuma nena mesmes paŋisi. Yar nena, apio kiena kia asape Parin Suŋe Lelaga Naviawaena. <sup>12</sup> Ana kiena kia taŋena m̄ena tai asiri sike ea pe yar tai kilia re kana kinas poli, naga taaga manene kilia. Kilamarana pilavila sane kap naŋa pivaga, a e ŋarina miyen ke karo na ŋarila kiena ne ŋarin suŋe lala. <sup>13</sup> Naga miyen m̄ena m̄ana kulkota viavi tai naŋa aputon pito e kuruta vena kila ve maran la ea, ana naga kiena kia si tai na naŋa asuma apio naga ea, naga sanini, asape Visena Wa kiena ne Ntewa.

<sup>14</sup> Ana e pogos nene, ŋegas nen yar na mara lala nae ma e peni, amiyowau ruruia e kulmrae yuwowo a akus kiela wosi yuwowo lala, asuma ataveve ke kiela nasumonena nene apano. <sup>15</sup> Naga ŋere la apano, kiena visena molue ke kome gona sane playu na mara naŋa mal ga lepas luwoka, naŋa yoko te plan purvanua na yomarava la akekapil. A siraun naŋa yoko naga taulu la, yoko naga suŋalu ve suŋen la, a naga ŋuarar ke plaki e limana, pototo tai naŋa urmi. Nakoena m̄arera ya naŋa sinemimiena kiena ne Ntewa na mava ligan va yar la akusia, ana yerkawa ne nanene narui yoko naga war imi m̄alivi.

16 Ana naga kiena kia taþena sike ga wa, naþa asiri e mana kulkota a e lana, sape  
“Parin Suþe kiena ne þarin suþe lala, Yerkawa kiena ne yerkawa lala.”

17 Nepisu navisi tai sunalar sike na naþa yepisun tegolia, naga pion pa manu lala naþa akaka ke metava ne, sape “Ei, kam punu ga aim lele taaga e pupia þaþagena kiena ne Ntewa.  
18 Kam manu na kanen tata lala, yoko ve ve piavi re ayunaen kinanena tai torokin amiu nenaga, naþa tas nen yar mare lala kiena ne nasinekar kiena ne Ntewa. Parin suþe lala, pupia yerkawa na mara lala, yar marera lala, wosi na mara lala, amio la naþa aþerela ke ne, amio yeririna kar ga lala la naþa ape yerkawa pona ape yar ve torokaki na yunaena ga lala, la make ga asunalu vena akila mara va Ntewa, ana naga taulu la kila monar la pa ke ne.”

19 Ana nepisu surmal viowa amio þarin suþe na yomarava amio kiela þegas na kilaen mara lala, apim amiyuwon vain la ke lele taaga. A sinelan asape akila mara amio naþa kus ke wosi yuwowo ne amio kiena yar na kilaen mara lala.

20 Ana asape akila mara narui, ana yar viowa lala amilan ga naþa lepas kiena ne Ntewa asunal veraga apa atarar kiela na sumonen luwoka naþa atarar ruru la nenaga, nane sur mal viowa amio navisawalena naþa pisosokan ga ne na pe yar naiilaena e kimi lala a sur nailanena lala. Sumo, naga miyunaen sur la nene pisa kotalia ruru nena yar lala naþa þere kiela sitomena

pano atamãan aĩe tatu na sur mal viowa pa e piamenala, apa amlot wowe pa kiena nono.

Ana la atarar ruru nena nasumon-ena luwoka na pegas viowa nene, ana akuwanpran luwoka pito e pulukapi naãa mumu ke ne.

<sup>21</sup> Ana taãena la pe akila re mara poli wa, amilan ga playu na mara tai molue kome gona naãa kus ke wosi yuwowo ne, pa sanene, pa sanene, te moĩar kare la amarmar pa ke ne. Ana taveve ya naãa nepisuia, manu na kanen kilamĩiu lala apim atewowa tas nen marena la naãani, akan pano-o meãela la puleule.

## 20

### *Apiar Yermare pa tol kas manu taaga [1000]*

<sup>1</sup> Ana nepisu navisi tai molue ma e peni pitomi tano, mlarar ke ki tai e limana, ki na pulutava na pulus nen marena naãa pito na pitove pe luas re poli, a amio ki nena, ãarar mĩena sen mĩarera tai. <sup>2</sup> Ana naga ãere mesmesun pupia nopi nene, naãa pe yermarua loĩara naãa Yermare naãa Yermare Lego, pa tarar ruru mĩarera, piar ruruia e sen, pisaar sape yoko mon mĩa sanene va tol kas manu ve taaga. <sup>3</sup> Ana kutarar naga amio kana sen naãani koven pito e pupia pulus naãa pito manene tano ne, ana kotawea, kiar ruru mĩeke ea, vena yar viowa nene ve va re si kilali yeririna lala na purvanua wetelu, va tol naãa kas manu ve taaga nene warovia. A kiena mĩareraena taãatete ãisi make na wa, komin naãa siraunia, e narin pogos tai ve plas ga, yoko naga kilia molue vena kila ke sina ga ãarina yam tai.



<sup>4</sup> Ana nepisu yo wa lala, amio la naþa atotano ateke e wos nela, naga la naþa apisir plan la rui vena akilia aliþere yar lala. A nepisu mēna ninun yar la moki naþa asuñā ga amio la, nane yar þes la naþa amlologon Yesu amio visena wa kiena ne Ntewa, ana ateroro kolmekilania. La nene pe amlotun re sur mal viowa nene poli, pe akinain re kiena wonta poli, a pe aþar re kiena tatu e piamenala poli, pona e limala, ana Ntewa kekaran la, kila la amal sina vena akilia asuñal amio Kristo vena avisuar yo punu ga va tol luas nen kas manu ve taaga naþani.

<sup>5</sup> Naþa amal si sanene, naga pogos þesia naþa yeririna lala amal si petan marena, ana la ga nene atolia. Taþena lala naþa amare ga asike na wa e pogos nene, la nene yoko atol ga kiela malena na wa e kana nalua nena, nane e luas nen kas na manu taaga nene. <sup>6</sup> Navisa ruruena wo kiena ne Ntewa sike e la naþa amal þes sina vetan marena nene, naþa la na kiela malena pe wa ruruia. Marena na lua taþatete nena tol la, ana yoko la ayuñae sane la ape yar wa kiena ne Ntewa, ape yar wa kiena Kristo, a yoko naga visir plan la avisuar yo amio naga e kas manu ve taaga nene.

### *Yermare, kana luas*

<sup>7</sup> Ana pogos naþa kas manu ve taaga nene þisi pae, yoko Yermare kilia molue sina e lele nakoena naþa sike ea. <sup>8</sup> E pogos nene, yoko naga va kar ga e purvanua punu ga e yomarava nini, visa kotalia si yar lala, a yoko naga werepran pupia þegas lua nene aim ve taaga,

nane yer Koko lala amio yer Makoko lala, vena aim si ave taaga vena akila mara va yeririna lala kiena ne Ntewa. A visae ñegas lua nene aimi ave taaga, la ave moki na ave moki, sane mras nen none la garo losi.

<sup>9</sup> Ana apureviraviran ruru la sa naña li na kilaen mara lala, amial vera ga akusro yomarava apim atol yo Yerusalem, yo naña Ntewa kekaran pañisi, naña naga yo kiena ne kiena yeririna la naña asike ea. Ana amiervivi ruru nena pupia pulkumali nañani, asape sinelan siaren mara narui. Ana amilan ga pupia kap tai molue veraga kom ma e peni pitomin la, kekan la pano-o kekan make la nena ga. <sup>10</sup> A Yermare, naña naga pisa kotalia la sumo rui, akoven lua naga pa e pupia pulukapi naña mumu ke ne, nane kapi ña nena naña akoven surmali viowa amio navisawalena navisokanena lalua apa asike e rui. Ana la telu nene yoko akus naloge viowaena e yo nene ko legiena a kolemallo, vano vano-o ve uro re.

*Naliñereena maro kiena ne la naña pe amlelaga re poli*

<sup>11</sup> Ana nepisu pupia yo na liñereen yar lala, naña miyuwowo na miyuwowo, amio suñe keviu naliñereen yar lala totano teke metava ea. Kiena naurarena kokonia ruru make yo nene, kila porotano amio sinapane la luwoka añure apevenin plan la apano akovio. <sup>12</sup> Ana nepisu pupia ñegas nen yar la tai, naga yar la naña amare nanua rui e yomarava, pupia yerkawa lala a yar kar make ga lala. Ana apim añalivi e nañani vena asuñal ase marana ne suñe keviu

naliṗereen yaru. Nepisu tus laṗas pike ṗa suṃa ga, ana apa akus ke sina taṗena, naga asape Tus na Malena, ana naga ṃena apike. Ana apisu vevea asape alual ya naṗa asiriyu sike e tus nene e lepas kiena ne yar mare la nene, ana la peve taaga akus kiela nakoarena taveve tus la nene. <sup>13</sup> A yar mare la nene, amio ṃena la naṗa amarmare asike e sive, amio ṃena la naṗa amare apa asike e yo nalogeen viowa rui, la make ga aimin si naṗa aliṗerela taveve kiela yuṃaena lala.

<sup>14</sup> Ana amlipere yar mare la nene pano-o ṗisi, asuṃalu akus sur lua nene naṗa marena amio ṃena yo nalogeen viowa nene, ana akovenpran ga luwoka veraga vito e pulukapi. Ana marena naṗa yaru la atol e yo nene, naga asape marena na lua. <sup>15</sup> A a si naṗa pe aṃal re kiena kia sike e Tus na Malena poli, naga ke narui akoven ṃena naga vito e pupia pulukapi.

## 21

### *Pulkumali viu naṗa Yerusalem*

<sup>1</sup> Ana siraun nene, nepisu peni viu amio yomarava viu aṃalivi, komin peni nasumo amio yomarava nasumo amio kana porotano lala a kana sive nena, akokovio make nena rui. <sup>2</sup> A nepisu pulkumali wa wo nene, Yerusalem viu, molue kom puna ne Ntewa ma e peni pitomi tano e yomarava. Nepisu naṗa apaia ruru po wa, sane sira tai naṗa amiyowauia po paṗisi imin vena akila talopa amio wona.

<sup>3</sup> A e pogos nene nemloge visena wo tai molue ma e peni, pisawal sanini, sape

“Nagane, Ntewa sinenan sape sike amio yeririna lala na yomarava, sinenan sape kila mña unña sike pu la.

Yoko aim ave kiena yeririna lala, komin naña yoko naga amio la lue narui, yoko naga imi ve kiela Ntewa lelaga.

<sup>4</sup> Wamarala make ga, yoko naga yumuplania, yoko marena pona tagena pona yepelalaena pona naloge viowaena, la nene peraga narui, komin naña pogos marua nakonua la ãaro pano pa kovio rui.”

<sup>5</sup> Visena nene ãisi, ana yar wa naña totano teke metava pisawalia, sape

“Ee, lelaga pañisi ãan wa! Yoko in na nekila make sur la imi ve urviu sina!”

A naga sikol ke sina ga pisawal nena pan inu, sape

“Nanini yoko nevisa visen tai van ko naña pe lelaga nena napo, naña okilia owasine ruru nenaga, a popon osirilua.”

<sup>6</sup> Ana naga pis mña ga, sape

“Kiau yumñaena make ga, nekila punu ruru nena ga!

In na in ãesia a in maro, in na nasiarena a naluasia.

Yar naña loge moto karia, yoko nevio mña wii tai e purpes nen wii na malena, nela vania mun korenan ga sanene.

<sup>7</sup> Yaru naña kiena malena ãaro e pog mñarera lala, sumal mñarera sumña vano-o taulu viowaena, yoko naga tol navisa ruruena

lala sane kiena lalimana. Yoko nesuũa neve kiena ne Ntewa kemua lelaga, yoko noure naga imi ve naruu.

<sup>8</sup> Ana yar viowa lala, la mũana yoko atol kiela lalimana lala. Nane yar sur la naũa pe apiawa re mũarera e in poli, naũa pe amelaga re poli, kiela ðelaga pioyowa paũasi, aũamũar yar taũana, akila piowa amio sira pona yermũane, aũar kimi, amlotun nono, ape yar navisokanena. La ke nene narui yoko ava atol marena na lua, nane e lelela ke napo narui, nane pulukapi naũa pe ponoyomũa, naũa mũawo ðele ga.”

<sup>9</sup> Visena nene nane ðisi ne, ana navisi nasumo la olua nene lala tai, naũa aũar pias nen sur olua na loge viowaena maro la olua na yomerava, pimi pio inu. Sape “Oim ke ne sumo wa, yoko nekila ovisu sira va talopa, nanene wona Narin Sipsip.” <sup>10</sup> Ana ðerelua inu nepa ga e ninuu, ana imimi lua mepa metol pupia tavie tai metava. Imimi lua mesuũalu mese yo nene narui, kipian inu e pupia pulkumali wa naũa Yerusalem, nepisu sina nomũa naũa molue ma puna ne Ntewa ma e peni pitomi ke tano.

<sup>11</sup> Pitomi ke sanene narui, naurarena kiena ne Ntewa suũa puleule, kila tego paũasi, sa naũa sur tai naũa pilavila ruru po paũasi. <sup>12</sup> A kana pupia kove nena miyervivi nenaga, pa metava na pa metava, a pupia pulutava lualima yam taaga pa lua [12] sike ea, naũa kana navisi la peve taaga apisuar ruru la mũaga. A pulutava la make ga, tai kia sike ea, tai kia sike ea, naũa kia kiena ne lus nae Israel la lualima yam taaga pa lua,

<sup>13</sup> naña pulutava telu sike lepas na lagawa, telu sike lepas na lagi pasipurua, telu sike lepas na mrae molue ea, a telu sike lepas na mrae pito tano ea. <sup>14</sup> A pupia kove nena suñalu sike e kana pupia kemrañe nena tol lualima yam taaga pa lua, asiri kia sike e peve taaga, naña kia la nene kiena nalologena la lualima yam taaga pa lua kiena narin sipsip.

<sup>15</sup> Ana navisi naña imimi lua mesun ke ne, naga kus ke natotou viavi tai naña kol e limana, vena va lual totou na pulkumali nene keviu sanape, amio kana kove nena a kana mratava lala. <sup>16</sup> Kove na pulkumali nene, lepas varoka piavi maran taaga, ana navisi pa mla kana totou nena, taulu tasme manu lua [2000]. A mla mña totou na yepasia siar tano pa tol metava, maran taaga ke sina ga e kana lepas la vari nene. <sup>17</sup> Pisi na pa pisu kana kove, mla totou na kana merorol nena, polo kana merpu ne lala pa taulu nena lualima yam orai [60] veraga. <sup>18</sup> A kove nene pe amiyuñen re e kilavaru kar ga la poli, ana miyuñen e kilavaru tai naña kana marana la po pañisi, a pulkumali yepas make ga lala amiyuñen ga e kol, mekiki po na po, pilavila po na po pañisi. <sup>19</sup> A pupia kana kemrañe na kove nena, la mña ga apaia ruru la amio kilavaru la naña powo, naña tai amiyowa e kana kilavaru naña maran taaga sanene, tai mña amiyowa e kana kilavaru naña maran taaga sa ke ga, pano pano-o tol make kana kemrañe lualima yam taaga pa lua nene. A kia kiena ne kilavaru lualima yam taaga pa

lua la nene, sanini. Nasumo, kiena kia saspā, na lua kiena kia sapaia, na telu, naga kalseton, na vari naga emrol, <sup>20</sup> na lima naga satonik, na orai naga kanelion, na olua naga krisolaet, na orelu naga perol, na ovari naga toþas, na lualima naga krisopres, na lualima yam taaga pa taaga naga sasin, a na maro naþa lualima yam taaga pa lua naga ametis.

<sup>21</sup> A kana mratava lala, la make peve taaga ape pupia perel peve taaga. Ana nepisu mēna pupia mrapa na pulkumali nene, naþa naga amiyumāen make nena e kol, po na po, pilavila paþisi.

<sup>22</sup> Ana sur tai naþa nemilania, nomāpe yoko nelual pupia yumā wa tai mēke likan pulkumali wa naþani, ana nekira nomāl re tai poli. Yo nene na pe yumā re na sanene poli, komin Ntewa na mava amio narin sipsip, yar la apa amlotun la e yo punu ga silaga. <sup>23</sup> A nomāl naþa e pulkumali nene naga mrae amio kupario pe tego re e poli, komin narin sipsip naga sane kana yomerarava nena, naurarena kiena ne Ntewa kila yo make ga asike ga e yemlagi silaga. <sup>24</sup> Purvanua taþena lala yoko ayal e kana pupia yomerarava nena, a sur wo ya la naþa pupia þarin suþe taþena na purvanua lala aþar māga pe kiela, yoko awar van Yerusalem viu nene, sane kiela nalaena lala. <sup>25</sup> Yo nene yemalolo taþatete yoko imi e pogos tai, kila sanene pupia kana mratava ne lala kilia suwowo ga sumā silaga, <sup>26</sup> a naurarena a sur wo lala na purvanua taþena lala yoko asumā aim lue ga loyumā e silaga. <sup>27</sup> Ana e lepas na

sur la naþa pe mekik ruru re nena poli, yoko taþatete nena tai va loyuma e nene pogos tai, a yar ai naþa kila yumaena naþa na mawaena pona na visokanena, yoko naga mena ga taþatete va loyuma ea. La naþa navaen loyuma, naga la ga naþa kiela kia, narin sipsip siri sike loyuma e kiena Tus na Malena rui.

## 22

### *Purþes nen wii na malena*

<sup>1</sup> Siraunia, navisi kilologia purþes nen wii na malena pan inu. Nepisu kana wii wo nena, merarava na merarava, mlau siar e yo wa kiena ne Ntewa naþa Narin Sipsip sike ea. <sup>2</sup> Kana wii ne mlau pano, kana yo naþa mlau pa ea mlau nena pa likan pupia mrapa na pulkumali viu naþa Yerusalem. Wii na malena nene mlau sanene pano, a purþes nen lak na malena lala asumal asike lepas luwoka. Laki la nene apo paþisi, komin naþa aþar mrasa e kupario make ga, yam lualima yam taaga pa lua [12] e kas taaga. A mas mena lala, apowo paþisi, komin naþa akilia akila ruru maiena kien yolai na purvanua make ga na yomarava.

<sup>3</sup> Sanene, yoko þelaga viowa la kiena ne Yermare na kila kareen sur make ga, yoko e pulkumali nene naga peraga narui. Narin sipsip sike e yo wa kiena ne Ntewa e yo nene, a pulen ga kiena yar lala naþa kiela yumaena, amlot lue ga e silaga. <sup>4</sup> Asike ga lavisinia, a asiri kiena kia sike e piamenala. <sup>5</sup> E yo nene, pe yemalolo re si poli, yo merarava make silaga, a pe yomerarava na



kap vivaga re tai poli, pona mrae. Peraga, Suḡe Ntewa ga pe purḡes nen yomerarava naḡa tegoli ruru ke yo nene, a naga ḡere kiena yeririna la naḡani, pisir plan la ape ḡarin suḡe na visuaren sur make ga.

### *Nawasuḡeena kiena ne Yesu*

<sup>6</sup> Ana navisi naḡa pis pan inu, sape “Sur la naḡa opisuia pona omloge, ape lelaga paḡisi, a yoko aim ave lelaga make nena napo. Kieta Suḡe keviu, naga Ntewa naḡa navisawalena na sumo lala amiyuḡae e kiena ninuna, naga pitetalia imimi kiena navisi lala mepim moḡalivin ko vena mekipian ko e sur la nene. Naga kila sanene komin naḡa naga sinenan sape kiena yeririna lala monar akilia sur la naḡa yoko ve ve piavi re aim aḡalivi.”

<sup>7</sup> A visena kiena ne Yesu e lele nene pa pan kiena yeririna lala sanini, sape “Avisuaria! Ve ve piavi re, neimin noḡalivin amiu sina. Yar naḡa tarar visena la nene ḡarera, naḡa apisawal sike e kiau tus wa nene, yoko wo van vaḡisi, yoko naga loge wo vaḡisi.”

### *Yoane pis maro*

<sup>8</sup> Inu naḡa nepisu sur lala nene, nemloge visena la nene, inu yermarua Yoane. A pogos naḡa nepisu make pae, nemloru nekinai e lana navisi naḡa naga kipian inunia, nemloge sane sineun nesape nelotunia. <sup>9</sup> Ana naga pialuḡar inu, sape “Toko, ve okila re sanene. In ḡena nepe yar na yuḡaena kiena ne Ntewa ga, sanene ko omio womla la naḡa navisawalena la nanua sumo, amio ḡena yar taḡena la naḡa apuarar

ruru ke visena na tus wa la nene. Popon telotun kieta Ntewa naga taaga ga.”

<sup>10</sup> A naga pisa mēna visen taḡena pan inu, sape “Ve owarwan re navisawalena lala naḡa sike e tus nene. Pog pimi ke lavis narui, popon yar la akilia ya naḡa asuḡa apisa ke ne. <sup>11</sup> Yar naḡa yepena ma yagogena, yoko kila kiena ḡelaga viowa va viowa laa sane, yoko kororaki na kiena mlamulen viowa lala va viowa ve keviu maḡene laa. Ana yar naḡa loge, yoko kiena yuḡaena mesmes lala aimi awo vaḡisi, yoko kiena ḡelaga wo lala aim ave wa ruru nenaga.”

<sup>12</sup> Visena kiena Yesu e lele nene, naga sanini, sape “Avisuaria! Nepimin ke naḡa ve ve piavi re nenaga nomālivin amiu. Neimi nemio kiau nalaen wo lala naḡa powo, naḡa yoko nekian plan va yar lala taveve yuḡaena wo la naḡa akila pan inu. <sup>13</sup> Inu ḡesia a inu maro, inu nasumo a inu nasirau, inu nasiarena a inu naluasia na sur make ga.

<sup>14</sup> “Ve ve piavi re, yoko pupia navisa ruruena imi mālivin ruru nena kiau yeririna lala. Apuvan ruru māla kulsota lala, amiyowau ruru rui, ana akilia ava awarpo yo e pulutava vena ava loyuḡa e pulkumali wa kiena ne Ntewa, akilia ava atol purlaki na malena. <sup>15</sup> Ana yar taḡena la mokliu naḡa taḡatete avam loyuḡa. Nane yar la naḡa asuḡa apa kar ga sane lokul lala, amio la naḡa aḡar kimi, amio la naḡa ataḡa kolau amio lau, la naḡa aḡemḡar yaru, la naḡa amlotun nono

lala, a la naña sinelan asape akila ðelaga lala na visokanena.

<sup>16</sup> “In na Yesu, nemligan navisi nene pimin vena visawal visena la nene van ko, vena okilia ova ola va kiau sumare make ga. Navisaarena naña apisaar asape molue kome lus kiena ne yermarua Parin Suþe Tepet nanua, in ne nanini. In na nepe verue naña Melag, naña pisawal ke sape lavis yelagi imi warpoyo narui.”

<sup>17</sup> Ninuna ne Ntewa mloge visena nene, pisawal pa Yesu sape “Pogaga, okilia oimi!”

Sira naña na talopaena amio, sape “Ee, popon oim narui!”

A yar ai naña loge visena la nene, popon naga mēna visawalia, visave “Ake Yesu, visae oim ga rui!”

Yar naña loge moto karia, avietava vania vena kilia vam loyuña. Yar naña sinenan imiena, yoko naga kilia tol mēna wii na malena, sa naña kiena nalaena tai naña pimi ga sa ga nene.

<sup>18</sup> Ana nevisa visena mārera tai van amiu naña yoko aloge visena lala na visawalena lala na tus wa nene. Visae yar tai sukol si visen taþena tai to metavan naña sike pa rui, yoko Ntewa kila naga war naloge viowaena make ga naña tus nene pisa ke pa rui. <sup>19</sup> Pona visae yar tai lalua si visena laþas naña sike pa rui, yoko Ntewa lalua si lalimana vetania naña sike e purlaki na malena, yoko naga taþatete tol sur wo la sa naña tus wa nene sape asike loyuña e pulkumali wa.

<sup>20</sup> Naga naña pisawal visena la nene, pisape “Sa ke nene narui. Ve ve piavi re, yoko neim nomālivin amiu.”

A sitomena kiena ne yeririna kiena ne Ntewa lala, asape “Visae ve sa nene, wo vañisi. Awis Yesu, oim vilaga!”

<sup>21</sup> A visena maro na lepas na sunena na kiau mñeniena, in yermarua Yoane nemlen nesape yoko lemamienna wo kiena kieta Suñe Yesu sike amio amiu, kam yeririna lala kiena ne Ntewa. Sanene.

**Lologena Wo Kienane Yesu Kristo Kome  
Kewo  
The New Testament in the Lewo Language of Epi  
Island, Vanuatu  
Le Nouveau Testament en Lewo langue de l'île d'Épi  
au Vanuatu — Niutestamen long Lewo lanwis, blong  
Epi Aelan, Vanuatu**

copyright © 2016 Wycliffe Bible Translators, Inc.

Language: Lewo

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

---

PDF generated using Haiola and XeLaTeX on 21 Feb 2024 from source files dated 31 Aug 2023

ee028e1c-7e53-571d-8041-681daaf580e8